

增修萬縣志卷三十六

藝文志上

文

粵自文翁化蜀世載其英漢有相如子雲唐有伯玉  
青蓮宋有眉山父子明楊升菴著述之富古今無對  
萬爲名區前型未遠文章當有師承乃經明季兵燹  
之後大半散失舊志所存落落數篇今雖極力搜羅  
終不可多得然見驥一毛嘗鼎一臠亦足遐想彪炳  
畧識旨趣矣

萬縣志

卷三六

藝文志上

文

一

西山留題

宋 黃庭堅

庭堅蒙恩東歸道出南浦太守高仲本置酒西山實  
與其從事譚處道俱來西山者蓋郡西渡大壑稍陟  
山半竹柏蒼翳之門水泉瀦爲大湖亭榭環之有僧  
舍五區其都名名曰勒封院樓觀重複出没烟霏之  
間而光影在水此邦之人歲修禊事於此凡夔州一  
道東望巫峽西盡郿駟林泉之勝莫與南浦爭長者  
也寺僧文照喜事作東西二堂於茂林修竹之間仲  
本以爲不奢不陋冬燠而夏涼宜于游觀也建中靖

國元年二月辛酉江西黃魯直題并書

送田畫秀才甯親萬州序

宋 歐陽修

五代之初天下分爲十三四及建隆之際或滅或微其在者猶七國而蜀與江南地最大以周世宗之雄三至淮上不能舉李氏而蜀亦恃險爲阻秦隴山南皆被侵奪而荆人縮手歸峽不敢西窺以爭故地及太祖受天命用兵不過萬人舉兩國如一郡縣吏何其偉歟當此時文初之祖從諸將西平成都及南攻金陵功最多於時語名將者稱田氏田氏功書史官

萬縣志

卷三六

藝文志上 文

二

祿世於家至今而不絕及天下已定將率無所用其武士君子爭以文儒進故文初將家子反衣白衣從鄉進士舉於有司彼此一時亦各遭其勢而然也文初辭業通敏爲人敦潔可喜歲之仲春自荆南西拜其親於萬州維舟夷陵予與之登高以遠望遂遊東山窺綠蘿溪坐盤石文初愛之畱數日乃去夷陵者其地志云北有夷山以爲名或曰巴峽之險至此地始平夷蓋今文初所見尙未爲山川之勝者由此而上沂江湍入三峽險怪奇絕乃可愛也當王師伐蜀

時兵出兩道一自鳳州以入一自歸州以取忠萬以西今之所經皆王師嚮所用武處覽其山川可以慨然而賦矣

岑公洞記

宋知襄州軍 岑像求

周文王異母弟耀之子渠成王封諸岑古梁國岑亭是也漢魏而下隸南陽棘陽縣今唐州胡陽西北四十里有棘陽城蓋岑世家於此黨錮禍起公避地鹽官更爲鹽官人其後去梁居江陵隋末天下亂公泝江逃難至南浦愛龕巖遂居其下片衣粒食悉無所

萬縣志

卷三六

藝文志上 文

三

營晏坐凡二十年兀然逝去郡人慕公塑像龕間世奉侍無懈唐獨孤霖段文昌皆爲文記公之德熙甯十年夏五月大旱靡神不舉久靳膏澤守臣諸公懇禱卽日大雨如霖一境霑足部刺史表其事天子嘉之優詔賁勅贈公虛鑒真人耆艾請遷妙庭觀置巖前俾黃冠之徒曰篤香火公之道遂大昭著竊原公去此六百餘歲名跡幾泯一旦神靈顯發稱謂與莊老文列等其故何也請以宗姓言之光武起宛葉征南以材武奮兵行如神所向無不披靡位參四七

之列梁武苦於奉佛寶昌以術業敷揚秘典首載僧  
史東晉僧猛以孤節卓行冠比邱尼唐太宗經營宏  
業中令景仁以清材奧識爲房杜亞匹或迹輝清簡  
或名標寶藏皆事著一時譽高當世岑公趨向惟清  
虛靜默未嘗有一言垂後寂滅已久而隱德升聞膺  
此褒錄聲實暴白與嶺雲江月輝映三峽品目自高  
遠殆非偶然蓋征南以功昌以學猛以行中令以才  
而公以道修蘊含蓄深淺不同故其報有崇卑久近  
之異無足怪也郡守蓋君體璟謂忝預末派使來求

萬縣志

卷三六

藝文志上

文

四

文故爲述其由來而繫以贊云 虛造冲漠兮鑒徹  
幽隱秉德既然兮錫號惟允靜無所營兮動無所蘊  
稽神靈之顯發兮庸詎非道力之強啓公居此巖二  
十年兮萬人奉公也甚莊公去此巖二十世兮萬人  
想公兮未央孤雲投壑兮謂公之袂段霞垂岫兮思  
公之裳公乎曷歸兮儼遺像於巖房望崆峒之遼邈  
兮謾傳廣成之修鍊顧石室之依然兮深悵赤松之  
弗見念餘派涓涓其不泯兮奚望於孤羨惟眞迹之  
綿綿兮無預海田之變元符元年六月三日朝請大

夫知襄州軍兼管內勸農事兼提舉房隨郢州兵馬  
巡檢公事柱國借紫岑像求謨

按王漁洋岑公洞詩自注元符間岑巖起像求虛鑿  
真人贊一碑李廌方叔所書則像求其名巖起其字  
舊志作岑像公求以像爲名公求爲字誤

萬州西亭記

宋南浦令 劉公儀

亭據郡西地藏靈盛以是名章章焉聞於峽中嘉祐  
八年冬月上命駕部員外郎東平束公守南浦郡郡  
瀕江蹲山土瘠而民嗇居室多草茨井閭之間櫛比

萬縣志

卷三六

藝文志上

文

五

皆是公下車席未遑煖火災屢作公患之乃籍郡之  
羨緡市材具構廣廈於西肆屋通衢而瓦之亡慮二  
十有二楹築水防表火道其害始息居民便之商賈  
貿易亡曝溼之苦未數月事舉政平時和訟簡公命  
僚屬燕於所謂西亭者周覽而駭曰此三峽之絕致  
也形勝之美出於自然非人力所能爲一面層崖列  
屏障也數畝芳池蘂蓮芡也水濕之幽雅魚鳥之遊  
吟天其以此開予非予承之而誰也池之西北舊有  
浮圖之宮四至和元年魯公虞曹剖符此地始建三

亭焉曰高亭曰鑑亭曰集勝亭集勝之前列射棚植花木焉歷數政不葺公乃度池之南岸創亭曰碧照取池水之盪漾也步亭之東構土地祠所以安神靈也直祠之北建亭曰綠陰取柳陰之翳茂也循亭而西有石方丈如席公命鑿之引泉環注其間爲流盃之所命亭曰玉泉亭之南有石突起公命方之以爲碁局結茅爲小亭而覆之由是池之周回皆有亭榭大抵公所興創多也如是之佛宮西津之大仙祠重修公府前之蘭皋亭

舊名濟川亭蜀人張俞賢良作記

率務約而完

萬縣志

卷三六

藝文志上 文

六

固不爲夸麗弗耗於官弗勞於民每良辰佳節與賓僚席於是極遊觀之樂公曰是景也非獨以適已而娛賓抑將以遺後來之好事者公以治平三年春受代還臺臨行命駕於此憐是佳山水之勝故謂公儀曰爾爲我誌其事謹按公之政所宜書者二興利除害仁也起廢修圯智也公之心乎仁且智其幾於道者耶時二月初吉南浦令劉公儀記南浦尉兼主簿孫鑑立石

萬州天生城石壁記

元安撫使

王師能

元朝造我區夏丕冒海隅出日憲述唐制分道以理  
天下昔先皇帝躬履蜀道利夔以東畀之先侍郎肅  
翼郡公地未悉平將星示變今聖天子遂命我宣撫  
司招討都元帥金吾上將軍楊公繼之受任以來盡  
瘁國事誓挈輿圖以報君王乙亥元正不兩旬而取  
開達越月而下洋川附庸列寨傳檄而定獨夔以上  
恃衣帶水未歸職方萬在江北城號天生昔昭烈上  
經蜀漢下窺三峽於此乎插劍蓋荆蜀之要會也公  
曰得萬則忠夔可次第而下是歲乃親董六師不憚

萬縣志

卷三六

藝文志上

文

七

蘊隆秋軍於城下者五旬遺檄論旨靡不曰善郡將  
上官夔怙險蘊奸侮慢自賢公曰且置此子於度外  
吾將有事於夔遂拔牛嶺一二寨而行越明年夏戎  
車再駕遠次於郊不芟農工不俘人民亦曰取之以  
力不若服之以德也上官夔自謂如此絕險除是飛  
來雖遣納降之款然陽從陰違姑延旬日欲老我師  
於是我公憤然建大將旗鼓對壘於筆架峯前嚴厲  
諸將分任地面三繞環攻八月辛未一鼓而拔其外  
城軍民大窘王師薄壘而營內城直可捫上蹴倒我

公不忍生靈塗炭一再遺檄原宥冀其保活上官夔  
終迷不悟是月甲申公是以益命姪開達安撫使監  
軍楊應之賈勇將士用夜半自城南魚貫而上王旅  
如飛一刻卽平上官夔尙施困鬪自干陣戮其餘生  
靈一無血刃是役也師能亦預披堅之列翼日公乃  
按轡徐行登城撫定建州牧制縣令崇學校完城郭  
民乃卽巴國之故居沐元朝之新化曰而今而後吾  
第爲太平民矣相與歌曰始時吾民迫於勢驅書守  
夜防靡有甯居我公旣來慰我無辜勞來還定安堵

萬縣志

卷三六

藝文志上 文

八

自如始時吾民困於征役無小無大朝不謀夕旣見  
我公念其艱食解衣以賜輓粟以給萬之卒徒解甲  
歡呼萬之官士見儀咸喜吁嗟斯城巉巖倚空王旅  
如飛伊誰之功問之諸將歸之我公公曰此州特予  
小試夔峽悉平端自今始師能庸謬不才誤膺隆委  
濫領州麾日擊盛美詎能默然姑錄其實以俟太常  
之大紅至元十三年歲次丙子良月日宣武將軍本  
帥府管軍總管萬州安撫使古珉王師能拜手勒石

萬縣新修泮池銘并序

明督學使

郭

棐

學有泮池古制也大雅美周王曰於樂辟雖魯人頌  
僖公曰在類獻馘漢儒言辟者璧也其淵澄環抱若  
半璧然也類者泮也其泮渙然有文章也泮之有關  
於學蓋自古記之矣萬有學繇宋始厥後建置靡一  
而泮制未備無以滙清毓粹萬厯戊寅黃岡李侯植  
至謁學宮慨然曰此豈建學初意哉既逾年政通人  
和乃鑿石鳩工開池導水俄有泉自地湧出清冽可  
探悠遠不窮凡皤髮之叟青衿之彥莫不同聲贊嘆  
以爲侯誠感所致夔郡推官前侍御餘姚任君記其

萬縣志

卷三六

藝文志上

文

九

事於石矣乃邑文學諸生復相率丐言於郭子郭子  
曰於休哉天人之相感召其幾豁然沛然流通無間  
斯泉之應期翔湧若持左券謂非天心默相焉不可  
也昔柳夢弼於夔記達泉魯有開於萬鑿魯池而地  
與人並彪炳於奕世今李侯所感而得者豈讓前美  
哉李侯爲邑三事遙修百度備舉其於學校尤惓惓  
注慮宜其誠之所感無深不入如此也予因綴次其  
事而爲之銘銘曰泉生天一行於地中蓄之有自感  
之則通猗與李侯心源誠愨念茲學宮泮池未鑿乃

鳩元石乃斲黃垠始來清冽繼演齋淪其源孔長其  
流斯漾月映川中風行水上撓之不濁澄之則清如  
璧斯瑩如鑑斯明以培桃李爲世楨幹以育鰾鯉爰  
翔霄漢龜筮叶吉神人胥和文風以暢露澤則多維  
茲侯功實裨化理敬勒貞珉以告太史萬曆壬午季  
春吉日賜進士出身中憲大夫四川按察司副使奉  
勅提督學政前禮部郎中番禺郭棐撰

萬縣重修城隍廟記

明太常寺少卿富順

君子之宰邑必急先務焉夫一邑之事叢脞糾紛固

萬縣志

卷三六

藝文志上 文

十

非一端然而先後不同苟於所當先用心注意而不  
之後則何事不成傳曰知所先後則近道矣詎不然  
乎夔之萬縣舊有城隍廟在縣治之西淺隘傾圮已  
非一朝夕今年春霍邱徐侯熙字文廣承命來宰茲  
土下車之初治官事如家事汲汲皇皇弗安寢室於  
是招集流移賑恤貧乏除奸革弊勸農復學民食足  
而士風興乃曰城隍之神所以禦災捍患爲民興財  
致用者非他神可比今瓦漂棟壞階移墻頽豈足以  
安神靈乎神靈且未之安而欲民之安又可得乎由

是涓日拓地鳩土庀材盡撤其朽腐易以新堅首建門樓次建正殿三間又買民地三丈建寢堂三間殿堂俱塑裝神像及侍從之眾左右衛以齋房九間皆砌以石塗以灰丹堊交飾金碧相映不半載而落成是役也費出於官無取於民故民相與樂其成而不知其所以成焉余以外艱還蜀舟阻斯邑邑之致仕知縣牟穎率士庶求爲記以垂不朽余自解纜金陵稔聞侯賢况道出其境而目擊其實烏敢以蕪陋辭夫城郭以域民郡邑皆然凡高城深池以溝以封者

非徒爲觀美實所以爲民是宜有神以主之而神豈可無廟以妥之乎廟因人而新神因人而靈人賴神而安神人相與有不疾而速無感不通之妙世之治邑者幾人能如侯之用心注意於茲哉侯誠可謂知所先後近於道者矣又建江會樓修兩渡水橋與夫縣治門屏郵驛皆已就緒歷任曾未踰數月而治績之多若此使久於其任則百廢俱舉有不待智者而後知焉故並書之以告夫來者庶知侯之能事時明成化七年辛卯歲仲春之吉賜進士中憲大夫南京

太常寺少卿前翰林院侍讀經筵講官同修國史富  
順書

萬縣尹方登遺愛碑記

明吏部尚書

衛承芳

余既解豫章節曾未窺司馬門而恩鑑長留計弗獲  
辭久乃出山經萬邑闔庠士暨父老遮道請曰敝邑  
方令以賢特聞冢宰所習今茲久道化成矣懼一旦  
之超遷無從攀臥吾黨業戒貞珉以識永念唯冢宰  
文焉余老羸棄筆硯久况居旅次安能爲役諸士曰  
我郡惟大家宰言人將信若著蔡而馬首且南倘令

萬縣志

卷三六

藝文志上

文

十二

君旦晚徵吾黨縱墮峴首之泪誰其識者敢固請余  
惟縣令親民世雅言之然多習而不察彼西銘之論  
同胞康誥之稱保赤亦何諄諄史傳備紀循良要以  
所居民富所去民思爲實效蓋難倖致云爾後世親  
民之學不講士苟且赴功名得百里而君之無論非  
良卽知白愛率託安靜聲視閭閻猶秦越幸秩滿遷  
去以爲恆蒼生豈有賴焉此無他疏之也方君幾五  
載於茲初終一節憂在民窮勤在民事興在民利除  
在民害詳見花封政績一編殆實錄云蓋其起心動

念以安百姓爲期境內呼吸痛癢罔弗關切宜民之  
怙若父恃若母不可諉若畏壘歟勞一身而澤千萬  
人歷五載而施千萬世雖往昔侈談卓密縣魯中牟  
曷足多哉余嘉令君之能親民有得乎學問之大敬  
筆而報諸庠友且備明史之傳循良者采焉萬曆甲  
寅歲孟夏月吉日賜進士出身資德大夫吏部尙書  
達人衛承芳撰

西山太白祠記

明 曹學佺

縣西有太白巖在西山卽絕塵龕也王象之輿地碑

萬縣志

卷三六

藝文志上 文

十三

目云絕塵龕三字在西山石壁上字畫瘦勁類晉宋  
間物唐人題咏甚多相傳李太白讀書於此有大醉  
西巖一局棋之句太白蜀人也其詩之見口蜀者若  
成都散花樓漢嘉峩峩山白帝城蜀道難等篇在集  
中可考而紀事稱其爲彰明小吏時令屬詞不偶輒  
爲接之令遜其佳以此見妒則東蜀楊天惠所載也  
予得諸碑刻有題江油主簿廳爲米芾書及象山留  
題云夜來醉臥月下花影零亂滿人衣袖恍如濯魄  
於冰壺也此真天仙語本集皆不載而涪陵有渡曰

李渡以太白曾渡此卽婦人稚子能知之矣獨萬縣  
西山者不甚著聞至爲天仙橋以別之而過者未嘗  
問也予詩落句云一自金陵問消息無人指向萬州  
看蓋甚致慨然黃魯直勒封院記謂西山之勝東望  
巫峽西盡郝鄆不敢與之爭抗魯直在蜀久斯言不  
誣予謂太白讀書此巖中宜有太白祠而萬令方君  
好古樂善予門人典客陸昇彤等唯唯叶力遂書源  
委於道士常明且系以詞曰太白先生金行之精隴  
西帝裔產於昌明起家小吏不習逢迎牽牛堂下諧

萬縣志

卷三六

藝文志上

文

十四

謔隨聲逢彼之怒離鄉遂輕扁舟下峽出白帝城顧  
瞻西山崱嶮崢嶸挺然拔出巧類削成素開練石翠  
點秋屏絕塵龕上夫非世情西泊厥迹讀書著名何  
時非醉而忍獨醒何事非局遑問變更事在有無語  
類不經人心愛之夸詡爲眞樹若曾倚其色敷榮泉  
若曾酌其聲清泠何以祠之屢屨上平裁虹爲棟架  
壑作楹峽江蒼蒼白雲自橫飛鳥時過嚶彼其名薄  
言防之而懷友生悵然不見涕淚沾巾聿觀茲役堂  
構以新懷賢述古二美則并江山勝壑文明道亨千

秋之後令名不湮

唐金紫光祿大夫使持節永州刺史巫山開國公冉

公墓誌銘

明戶部侍郎 高公詔

公諱仁才字徵文資性英勇大業末以功授通議大夫義甯二年平綠郎有功秩金紫光祿大夫涇州刺史封巫山公武德二年詔加前開國食邑持節浦州刺史貞觀六年遷澧州永徽二年入朝優詔遷使持節永州刺史三年九月卒於任年五十六訃聞賻贈有加太常攷行節惠諡曰果五年歸葬萬州南浦之

萬縣志

卷三六

藝文志上 文

十五

萬輔山舊有龍朔間碑一統志可攷也銘曰冉氏之先代稱有人系序既遠孰爲疎親至於睢陽信州是因梁有內率雲麾世臣以及於隋開國平城招諭黔州思夷功成封守正業莊肅易名乃誕賢允英武且明綠郎糾聚倏如烏蟻唾手勦平進秩金紫出領涇州諸將刺史迨於有唐五州馴理優詔遷永使節獨荷勞勩既豐專城嘯坐將星忽隕物故出叵好力勁勇節惠諡果恤典有加賜葬南浦亦有豐碑照耀萬輔中遭蜀難毀於風雨子姓世傳是信家譜承家之

喜河洲騰芳傳世十六發於西陽歷宋迄今永保封疆吁嗟果公德厚流光我明龍興覃此隆恩起千載廢有此令孫忠孝大節垂裕後昆作此銘章表於墓門明通議大夫戶部侍郎前副都御史巡撫江西等處地方內江高公韶撰嘉靖二十年辛丑孟春吉酉陽宣撫司嗣孫冉元謹立石

萬縣重修文廟碑記

明貢生 沈巨儒 邑人

昔三代以上皆有學以祀先聖先師而學之建實自有虞氏始然考之經傳先聖先師俱無專主故其姓

萬縣志

卷三六

藝文志上

文

十六

氏多不載至有周之末天生我

孔子繼堯舜禹湯文武之道垂教天下萬世而後堯舜禹湯文武之道如日月經天江河行地也自是有天下者由國及鄉皆建學立廟春秋崇祀之以顏曾思孟四大賢配饗別建 啟聖祠以祀 聖父叔梁氏以顏曾思孟四大賢之父配饗至正室外之左右建二樓左藏經書圖籍右貯籩豆簠簋階下建兩廡以祀 歷代理學先賢先儒廟門之外左設名宦祠右設鄉賢祠皆祀有功於聖教者而門前數十步鑿泮水如

半壁以節遊觀四面如矩以象地之方墻垣如規以象天之圓凡此卽吾萬邑古制可概天下鄉國規模也猗歟休哉自三代以後以迄於今

孔子專主先聖先師之席也道隆功盛蔑以加矣蜀邁不幸自甲申流寇犯川詩書灰燼宮牆邱墟幸

王師定蜀而萬縣草昧伊始且中間頑梗作崇任事者雖勉力恢圖率皆止創正室而後無 啟聖祠前無兩廡遂令 聖父羣賢諸儒不得崇享祀其於報本尊崇之典能無闕焉我邑侯張公永輝吉貞以壬戌

萬縣志

卷三六

藝文志上

文

十七

歲星臨茲邑下車卽先行釋奠禮遍觀古蹟之旣頽懼

聖靈之未妥慨然以建學作人爲己任於是百務未遑卽捐貲勵士董其事不期年而大功落成由斯

啟聖雝雝在宮

先聖穆穆在廟先賢先儒濟濟在左右明倫有堂櫺星有門而菁莪棫樸辟雍鐘鼓之風可復見於後矣蓋

孔子之道如天其作春秋明王道以天自處卽以天子之事自任故雖未登堯舜禹湯文武之位而能繼堯舜

禹湯文武之道至使萬世帝王無不入學北面執弟子禮凡天子之太子公侯卿大夫元士之嫡子皆執籩豆駿奔走以明君臣父子長幼之節焉然非後起而有心斯道建明光復之如我邑侯張公者又何以使煌煌古道復見於今日也哉余於是序二帝三王以來獨吾

孔子專主先聖先師之席之本未並我邑侯建明光復之偉功勒諸石以誌不朽云

萬縣重修關廟碑記

沈巨儒

萬縣志

卷三六

藝文志上

文

十八

粵稽史傳記載自古名將或以勳業著或以才智著或以忠節著不可勝述固無論已余獨於讀史之餘至漢之

關壯繆唐之張睢陽宋之岳武穆每三致意焉以其皆得於孔子之道者也何以明其然也觀睢陽之被圍也斥賊曰女未識人倫焉知天道武穆自道曰仁智信勇嚴闕一不可此孔子達道建德也至我

壯繆關公生平志在春秋矢誅亂臣賊子凜凜節義直與日月爭光是以普天率土春秋俎豆繼孔子而裡

祀未艾眞千古一人而已雖然猶有說漢高帝豐沛人也以布衣提三尺劍有天下旣開創於西復中興於東閱四百年又賴漢壽亭侯申大義左右昭烈嗣炎漢正統於吾蜀則其爭先於五虎之中奮威於三分之國直與諸葛武侯鞠躬盡瘁死而後已者同心一德焉意其生前勳節旣彪炳於吾蜀則其沒後在天之靈英氣忠魂與昭烈陵寢之在吾蜀中者常繞於吾蜀也明矣萬邑廟貌舊在東關外鐘灘江岸之上自經兵燹久成邱墟今西關內卜建於文廟之右

萬縣志

卷三六

藝文志上

文

十九

者乃

王師定蜀繼事也復經逆孽之亂頽毀荒穢未妥神棲邑人水師傅公隨轅蕩平川東事竣卽慨然捐貲鳩工重修之是役也一則以光聖人未墜之道一則以表文德武功之符屬余爲文以誌之余因述其前後事以爲記傅公諱爾學字睿初其先湖廣人

蕩平東川碑記

代徐提軍作

沈巨儒

粵稽古帝王御世虞有有苗夏有有扈商有韋顧昆吾周有淮戎頑民率皆戡以武功綏以文德恭維我

世祖章皇帝以順天應人之主興弔民取殘之師享九有甯

萬方暨我今

皇上繼體守文秉德成康東西南北無思不服者幾四十年

何物吳三桂敢負

國恩大肆兇逆跳梁滇黔以干天誅而逆豎譚宏始以  
井蛙脅從於川北繼以首鼠竊據於川東恃彈丸天  
城爲負嵎之虎用么膺羣小爲百足之蟲而陷川東  
數萬生靈爲處堂之燕遊釜之魚嗟乎傷哉事始庚  
申秋八月也事聞

萬縣志

卷三六

藝文志上

文

二十

皇上天威震怒命

臣

會同將軍

臣某

章京

臣某

率滿漢精銳

由楚道水陸並進一戰而克巫山再戰而克夔城三  
戰而克雲陽隨挽舟師乘風直上不二日而直造逆  
巢城下兵不血刃矢不傷鏃而天城土崩元兇授首  
逆黨傾心此皆上荷

朝廷威靈下藉諸將士勇力露布以聞當無煩

睿懷西顧矣書曰殲厥渠魁脅從罔治舊染污俗咸與維

新時元逆已誅從黨咸服臣惟仰體

皇上好生之仁勦撫并用之旨宣布德意招徠流移不旬日

而扶攜載道襁負來歸余乃屬其耆老子弟而告之  
曰嗟爾百姓本係良民陷於水火罔見天日自今以  
後毋曰蜀水險也爾視我師如越溪澗毋曰蜀山峻  
也爾視我師如履康莊習文者屬我司徒習武者屬  
我司馬務本者歸田逐末者歸市改爾舊習服我新  
政念茲在茲永蹈斯言凡此皆布  
朝廷文德以全武功之本末因勒斯石以示全省耆老  
子弟取鑑往轍垂訓來茲共享

國家昇平之福靈長之運於萬億斯年也云爾康熙十  
萬縣志  
卷三六 藝文志上 文 二十一  
九年歲次辛酉仲春朔

按徐公諱治都見

國朝名臣傳

增修學宮記

國朝萬縣知縣

張永輝

壬戌之秋余奉

天子命來牧南浦見城郭傾圮人民凋敝荆棘叢生荒烟滿  
目未嘗不爲之感慨歔歔視事之明日謁

先師廟行釋奠禮見學宮止存正殿三間而旁無兩廡後  
無 啟聖祠四配十哲而外裡祀缺然且池爲采芹

之地奈何頽塌石積周圍牆垣四顧皆無而其甚者更有雞豚馬匹充斥盈庭何以奠先靈化民俗乎余惻然傷之因謂諸生曰夫內而辟雍外而郡邑各建有

先師廟春秋必告虔者所以大尊崇也夫尊崇

先師必尊崇所自出况羣賢羽翼道統諸儒闡明聖教安可以闕焉不祀顧令褻越如斯耶諸生曰萬邑介於水陸頻年逆亂兵戈相尋無有甯日學宮久已荒廢文峯雖有都厯插天而後殿不聳閭汶之氣消索人

萬縣志

卷三六

藝文志上

文

二十二

文賢書不登者已二十年矣前任水師營傅公僅建正殿三間他未及舉蓋有待也越明年癸亥余乃登彼高岡度其紀堂遂鳩工庀材闢後山之數丈而建啟聖祠平東西之隙地而爲兩廡整南方之半壁以爲池建中央之數尺以爲臺墻高數仞也堂廣數武也升降有序階級森然也迨大工告竣而啟聖祠適與都厯峯相爲掩映程子介石輒登雲路而染天香呦呦鹿鳴於焉以賦然後知學宮爲人文發越之地固有如是之不爽者乎今棟宇巍峩輝煌丹牖

非獨妥侑 先聖賢在天之靈蓋欲諸士子鼓篋肄業咸進而學焉夫肆爲工事學爲士資士君子而能奮發爲雄潛修實行不獨將來之甲士聯雲且率一邑而化爲仁讓之俗此余之厚望也夫亦余之厚幸也夫康熙二十有二年歲在癸亥冬十二月朔文林郎夔州府萬縣知縣西河張永輝撰

萬縣靜波樓記

萬縣縣丞 趙志本

南浦枕大江而城日與江之波文相盪漾其或風日晴和漣漪洄洑是爲清波其或洶濤激石澎湃渦漩

萬縣志

卷三十六

藝

文志上

文

二十三

是爲怒波清波令人喜怒波令人懼將欲去其怒波而並去其清波乎抑將留此清波而並留彼怒波乎是非靜之道不爲功夫靜艮止之象仁者之所安也波至不靜而我一以靜鎮之中孚所格未有不相率而歸於靜者是故念宵小竊發盜賊之波未靜也刑以靜之而人事之波靜念鼠牙雀角爭奪之波未靜也政以靜之而人心之波靜夫江與人原相感應人心人事之波無不靜則江之波亦與之俱靜將日見夫漣漪洄洑之清波而無復澎湃渦漩之怒波也必

矣雖然猶有說子產曰水弱民狎而玩之故多死焉  
波之靜毋乃示民以弱與非也蓋克剛克柔寬猛相  
濟之爲靜而非頽靡不振之爲靜也夫不見朦朧巨  
艦錦纜牙檣之往來於波心者波固日載之而無不  
勝斯誠爲波之眞靜而豈若西流弱水不堪盃渡徒  
於至靜之中而多所不靜也哉乾隆五年建樓於城  
南俯瞰大江落成之日名曰靜波其亦仁人之言而  
深心於治道者與建樓而名之者誰南浦尹今牧忠  
州之墨韻劉使君也

萬縣志

卷三十六

藝

文志上

文

二十四

捐設鳳山書院膏火序

邑令

仇如玉

竊惟十年樹木尙藉栽培多士舒翹尤需振作談經  
而闢石室文翁著美於前繼化而立講堂高旻傳徽  
於後三千太學奉稽康以爲師五百門人從郭瑀而  
如市蓋敦崇儒術自古爲昭而樂育人材於今尤烈  
萬邑星分軫翼縣志漢唐灤水彭溪清波映月峩眉  
都歷文筆摩天仙留太白之巖芝灌岑公之洞誠地  
靈而人傑遂鍾秀與毓奇沈慕廬理學是宗關心名  
教胡禹錫博聞雅擅築室授徒至於學嗜髫齡尙溯

越鷄之揆藻業成苦志羣誇時望之聯鑣而且四鳳  
流芳二龍濟美固賢豪之踵起亦奇杰之間生余也  
系籍西冷縮符南浦未甘心於俗吏翰墨爲緣每刮  
目於文人風塵是賞靜數桂樓之樹間披金島之沙  
握瑾懷瑜英姿卓犖揮毫染翰興會淋漓惟是影寂  
橫窓未克焚膏而繼晷修仍暗室何來太乙之燃藜  
雖夙貯之有資實度支之不足所幸風稱慷慨情樂  
捐輸不靳傾囊共襄盛舉置膏腴之產孳息常充掌  
公正之衿絲毫不染甄別兼收童冠還教甲乙等差

萬縣志

卷三十六

藝

文志上

文

二十五

分頒各判低昂俾令功夫黽勉由是儒林聿盛藝圃  
爭妍文心開午夜之光天上觀德星之聚高堂施帳  
巧度金鍼精舍橫經班聯玉筍春風滿座口授而倍  
切指南化雨隨時心悅而咸思面北四圍燈火輝流  
講易堂邊比屋書聲響徹迴瀾塔外無異瑤房容與  
何殊仙窟徜徉彼蓮峯蔚秀於郡城猶是蹊成桃李  
卽錦江集成於都會無非育此菁莪斯上承夫闢門  
造士之庥亦仰體夫雅化作人之意惟願鶴峙鸞翔  
之彥龍文犀角之英譽早鴻舉高折蟾宮之桂名長

鵲起連觀上苑之花將見金馬碧鷄人競仙曹之崇  
列豈徒騰蛟起鳳坊傳盛蹟於先朝也哉

捐設養濟院孤貧口糧記

邑令 仇如玉

蓋聞聯胞與於蒼生欲立欲達軫痾瘵於赤子已溺  
已饑政溯西岐先窮民之莫告憂傳中古憫昏墊之  
無依自來仁人君子之用心務使鰥寡孤獨之得所  
惟茲萬邑夙號安鄉幅員當水陸之衝原多雜處蓋  
藏極人烟之密難免窮居彼如老邁伶仃惟有任衰  
頹而待斃亦若疲癯殘疾未能資膂力以營生靡室

萬縣志

卷三十六

藝

文志上

文

二十六

靡家既乏數椽之自蔽非親非故並無三黨之堪依  
凡此可矜皆所宜恤查養濟雖有其院已成敗瓦頹  
垣問孤貧莫給以糧幾等鳩形鵠面倘乏生全之策  
恐爲溝壑之流欲發婆心苦無公項於是長官首倡  
竊慙廉俸無多何期閭邑率從咸覺輸將恐後好仁  
者當仁不讓慕義者見義必爲白鏹朱提多寡均隨  
其願富家殷戶捐施悉出於誠初非有意招徠不令  
而偏如流水亦未設緣募化急公而皆欲解囊幸積  
少以成多廼量入以爲出增修墻屋無憂風雨之漂

搖設立口糧俾得饗殮於朝夕或男或婦均須土著之稽得半得全不失平施之稱額數垂以有定經費何慮不敷產置膏腴凶荒無患資在孳息子母當權掌管擇公正之紳衿不令錙銖侵蝕籌議立長久之規則毋教終始紛更從茲邑鮮啼饑途無餓殍南浦風成熙皞東川俗美敦龐雖慷慨樂輸第出濟貧之一念而神明默鑒實爲造福於三生豈徒名勒貞珉千秋不朽將見慶餘積善百世其昌是爲記

續捐收埋浮屍公樂堂經費序

邑令 仇如玉

萬縣志

卷三六

藝文志上

文

二十七

書稱作善易繫積善善不必非常之功德能推其仁心以共襄義舉斯卽樂善之大也萬邑濱臨大江當秋夏之交山水陡漲上流舟覆其浮屍漂泊於東關外之巨魚沱迴流曲折迫近沙岸觸目心傷嘉慶癸亥權篆王公抱濟人之願厪己溺之思與邑之紳士捐貲生息以作每年收埋之費斯固王公之惠政亦紳士之美意也與古之澤及枯骨者將毋同獨是限以經費埋屍則祇以篋簾裹之桐棺未具尙慮土親雖免葬於江魚終難安於泉壤在諸首事亦惄然以

爲心之所未愜者余自庚午履任以來於地方緊要  
事次第舉行於此尤加意焉夫功莫難於創始事尤  
重於成終既憑藉之有基宜積累之益厚昔賢倡率  
先得我心擴而充之則規模斯備而久遠可圖所幸  
諸首事與城鄉之好義者知余心之惓惓於是也彼  
此勸勉踴躍樂輸共捐錢千餘串添置田業仍交公  
正衿耆輪流經管本貲既足孳息自充凡收埋標號  
悉照舊章議添大布二丈棺木一具先期置辦裕備  
俾屍軀藉裹裝殮至瘞埋以後無需再移骨塔蓋人

萬縣志

卷三六

藝文志上

文

二十八

土爲安也是舉也經理有人可歷千百年而勿替已  
惟願天心仁愛默佑斯民永慶安瀾沈溺日鮮豈非  
幸甚而首事者云得有餘貲卽作惜字紙培義塚各  
公用余曰此皆善舉也福田不嫌廣種也夫施德不  
求報豈有心於啣結而吉因惠廸理有固然邑人士  
樂善不倦如是也其食報豈有艾哉

遺愛集序

翰林院檢討  
國子監司業李

惺  
塾江人

遺愛集者碧溪宋侯之輓章而靜軒魏君所甄錄也  
蜀自李冰著績於離堆文翁流芬於石室代多名宦

史不絕書宋侯以今時之碩望躡曩哲之芳蹤凡經七縣始至萬州曾不一年遽成千古里忤塗歌之未竟街號巷哭之旋聞魂兮往矣歎蒼天之殲良人涕既隕之如嬰兒之失慈母顧薤露易晞而棠陰勿剪摹清標而繪像綜懿軌以刊碑新成石相之祠并立樂公之社以云遺愛夫何間然則有紆青拖墨之賢握素懷鉛之彥聞訃增悼發言爲詩字字纏綿言言激楚坐峽江寒引猿啼而入曲巴山月暗含鵲泣以成聲篇什既繁記傳咸備雖詞各異體而人有同心

萬縣志

卷三六

藝文志上

文

二十九

焉夫以循良之吏稱爲佛子奉若神君苟或挽之不  
留尙且恤乎若失矧當長逝誰謂不傷然而德以述  
美實以誄華文生於情哀然成集未有若斯之盛者  
也魏君恐其久而散佚并欲廣爲流傳謀諸桑梓付  
之棗梨可以代襦袴之謠可以備輶軒之采音徽未  
沫矩範長存矣僕竊猶有進焉夫名者實之賓也前  
者後之帥也此老已云沒要之雖死猶生廉吏而可  
爲能無因愛滋慕倘不負其所學必有感於斯文則  
遺愛集者非惟歎逝亦以勸來云爾

萬縣尹宋公大中歸葬磁州記

大竹 王懷曾 魯之

蜀去京師五千里土腴而物阜人樸而畏法仕宦者以爲樂土顧余往往聞諸收令之言曰蜀之民愚而好訕上甚不義退而徵諸其邑之父老又往往實聞其訕而未有以解也則爲牧令解之父老曰 朝廷使牧令來非官爾父母爾也父母而慈子之幸父母而不慈子但當自謹飭無致父母撻楚而已不當以不慈責父母也父老聞之不能非吾言然亦似未遽以爲是余雖爲諸牧令解之父老矣終不能爲諸父

萬縣志

卷三六

藝文志上

文

三十

老解之牧令之前旣而曰夫蜀地方數千里郡縣以百數人民數十百萬今不聞其報上而以訕聞也雖謂之不義固宜戊寅六月萬縣魏明經士良歸故令宋公大中之喪於磁來京師遍稱宋公之德曰宋公以孝廉令蜀久以昨歲泣吾縣其聽訟也平其爲治也重士而惠民其爲人也遠利而不近名其感人也誠故不數月而教成不幸不期而卒其卒也母老子幼不能歸其骨邑之民哭□如慈母其前宰通江也活饑民數萬至是聞公卒裹□□而來哭者數千

人凡所曾泣處無遠近皆來會送葬遂致賻千金歸公喪士良實護喪奉其老母弱子葬公於磁之兆而後來此且將爲父老請公祀也余聞之而喜曰乃今有以爲諸父老解矣然又無以爲不義蜀民者解也夫通江萬縣數邑之民皆素所謂訕上不義之民也今宋公死千里而會葬哭之如慈母卒歸其喪定其宅甯其人可謂不義乎嗚呼宋公之賢也非宋公之賢無以成蜀民之義宋公死民其不幸也夫然公之卒也榮後之人必有慕公之行者不可謂非蜀之幸

萬縣志

卷三十六

藝

文志上

文

三十一

然公卒而不能自歸骨有老母弱子而不能自存安知見之者不且怵然懼更以宋公爲戒謂廉吏可爲而不可爲也乎嗚呼吾惡從而知之也

黑洞溝記

邑歲貢生

王繼掄

佛印得勝之間有谷焉深而幽險而偪土人以溝呼之號曰黑硎東西兩山對峙絕壁如削層疊而下臨於澗不啻萬仞北則馬頭突兀屹立與二山爭勝水合東西而南注循口入兩旁無徑履澗石上水多潛行石下清韻如絲竹濁則雷聲殷殷仰視三山穿雲

入漢石罅隘處僅可通人兩崖幾合天光一線日色  
惟卓午可覩中有石**梯**古蹟通東西行然多圯無記  
誌不知始自何代廢自何年欲詢之而無由也東澗  
亂石塞絕不可上西澗及半爲棧而上焉兩山之要  
有道在西崖者隨石磴盤曲而上下陡絕頂上突出  
懸石若星綴恍惚欲墜仰視神悚股慄非胆決者不  
敢過也東則首尾偪而中闊初無行道今則鑿斷崖  
脉**梯**之可通輿馬矣迤邐上至絕頂懸壁西有佛龕  
在焉山東可遠望而不可近相傳以爲大士像云其

萬縣志

卷三十六

藝

文志上

文

三十二

老樹古藤生石縫者根欲拔起拳曲臃腫不中材度  
多朽腐採樵不能得隙地豐草蒙茸土人刈以餌牛  
馬荆棘薈蔚中百鳥喧鳴時與風籟之聲相應多鷹  
飛遶谷中俯視其背大小厯厯可數多猿每數十爲  
羣食農人山穀以鼓角驚逐之則奔過崖穴矢銃不  
能加多煤穴硎取之深入者至數百丈淺者亦數十  
丈民之上著者享轉運之利甚溥當流賊猖獗時鄉  
人避患依崖阻險以居屋連棧接望之若蜂房雞柵  
焉以火銃置隘口賊不敢近全活者數百家谷中春

溫夏涼秋冬濃霜積雪及崖之半而止澗旁藝藍不  
萎每雨霽雪消西山朝爽東壁晚霞娟然可愛值陰  
晦須臾濃霧充塞山谷皆平惟見白光一片若雨集  
水漲則崖間飛瀑萬道兩澗洪流衝激勢若電掣雷  
奔山鳴谷應聲聞數十里平時兩澗水聲可候天之  
陰晴遠近以此占旱潦焉夫以如此奇境乃置之於  
遐陬閒曠之鄉騷人逸客未嘗一涉其地山農野老  
樵夫牧豎又不能言之間有好遊者過之雖詫以爲  
異或自崖而返或一覽而去亦但識其大畧而已余

萬縣志

卷三十六

藝

文志上

文

三十三

自丙寅遷山后庚午辛未館於谷之南岸數經其地  
每流連不能去凡崖穴水石之奇尤禽獸草木之異  
狀風雨晦明之殊致無不親覽數見而常新於以嘆  
宇內之異境奧區嘗有遺於尋常耳目之外泯沒而  
不傳如此者豈天地之秘藏而不以示人歟亦或  
有待而後顯也因記之以待後之問津者

張烈女傳

邑歲貢生

王繼掄

烈女張氏小妹者縣西鄙農民天位仲女也幼許字  
吳氏年十□未出閣資性敏慧容貌娟好教匪之亂

賊突至其家父奔匿母及兩弟俱被掠覩女美欲污之不屈怒脅以刃女從容曰釋母與弟當隨爾賊收刃并驅其母弟以行少頃又哀懇之賊果縱其母及弟被女以紅綃翠鈿曰天人也乘以馬前後邏護之行里許度母弟已遠乃下馬取服飾碎裂大罵曰萬死賊欲污爾姑耶賊盛怒啐之罵益厲遂殺之母劉氏素有志操臨別私語女曰綱常二字切勿忘女頷之以故不出閭境而蹈白刃此嘉慶三年五月初六日事也時鄉人有被掠逃歸者述甚悉予聞而嘆之

萬縣志

卷三十六

藝

文志上

文

三十四

曰是所謂從容赴義者乎夫禍變猝乘兵刃加頸死生呼吸之間雖鬚眉丈夫猶難不屈况一孱弱女子乃能堅白自矢不磷不緇何其貞也環繞皆賊經刎無門非峻激其怒無以速死而完其貞舍生取義不亦烈乎當女陷賊時已不有其生但不緩之須臾則不能保其母弟勢必至因已故而駢首受害雖死有遺憾也此與朱子所錄竇杜二女投崖事相類而保全骨肉氣概稜稜又有過之者夫以民間女子非如宦室世家之秀素涉書史講禮義而錚錚皎皎若是

殆出於天而成於性乎抑亦

聖朝風化涵濡浸漬之久有以遍周於窮簷蔀屋而然乎  
獨其捐軀義烈無表揚之者致令白璧埋光貞魂賚  
憾是可惜耳因書而藏之以爲後之採風者備覽焉

永甯礪碑記

邑廩生 何志高 西夏

南浦之西六十里有水焉曰灤溪發源於分水嶺注  
川於灤塗駟當天作凍霖灑灑澗澗淘淘濇濇激湍  
騰駛瀑布喧飀行人緣岸如蝟莫敢憑凌嶮界甘甯  
壩一閔瀕溪周道所躔舊置小艇頗云方便然亂濤

萬縣志

卷三十六

藝

文志上

文

三十五

瀧則怵於震盪艤填淤則蹇於污濡沆瀣旣退或跣  
躡涓瀨或步渡畧約皆掉慄飀艱君子恤之爰有毛  
君蔚然徐君步雲郎君大朝大作饒益捐資釀金鳩  
鼻屨攻嵒岨鑿硤礪以建菑架礪硤而橫互倚成孔  
砧雖溺溺瀆潏無虞硤硤也自時尠藉一葦之杭恆  
憑長虹以渡殊塗安步乎通津羣動捷登於彼岸利  
濟宏矣夫雨畢而除道水涸而成梁王政也人能不  
靳財力興利除害斯得尙乎公義矣曩者壩眾建浮  
圖於洞頭砥柱中流轟轟刺天今復爲石杠於上游

均爲勝舉然是役也思艱圖易以立功德又愈於裨  
補形勢而壯游觀也

陳孝廉墓誌銘

國朝大理寺卿 甘家斌 秩齋

君少於余十四歲乃叔鸚峯公則余鄉科同年也余  
官京師時君以廩貢遊太學繼又舉孝廉應禮部試  
先後得閱君文欽爲績學名儒歎賞不置今余主講  
於夔令子寶從余遊乞銘君墓按狀君榜名二士更  
名士杰字兆升號桂山別號靈崑昆季四人君其仲  
也少穎異通經史爲文炳炳烺烺不屑凡近嘉慶元

萬縣志

卷三十六

藝

文志上

文

三十六

年丙辰甫及冠卽補弟子員學使奇其才深器重之  
旣而戊午庚申辛酉甲子四入棘院輒掉鞅人比之  
劉蕢而君志益壯不稍挫也啟縑緡勤斧藻惡卧焯  
掌週寒暑無間由是湛深經術所學愈進乙丑試高  
等食餼次年援例貢成均赴監肄業不忘交遊有後  
漢仇香之風旋丁母艱匍匐歸里服闋後肯堂肯構  
於己已落成恰屆尊甫汝學公六旬大慶親友畢至  
舉觴稱賀九如載咏之餘並誦君子攸芋之句以侑  
爵喜可知已越明年赴京師入北闈得登虎榜列賢

書半生苦讀一舉成名捷報遙馳高堂悅豫顯揚夙  
願何幸而償於此日耶然而君之壯志猶未已也祛  
蠹探驪企題雁塔跋涉五千餘里閱辛未甲戌丁丑  
己卯丙戌壬辰二十一年凡六試春官三膺鶚薦跡  
其含華佩寶玉節金和洵足翔步蓬瀛蜚聲翰苑特  
惜數奇不偶朱衣吝點頭耳君賦性剛毅存心正直  
凡立身行己皆光明俊偉循循矩矱無稍踰越故里  
黨稱頌謂與伯夷之不視惡色不聽惡聲有同心焉  
及其待人也  
不立崖岸不設城府不矜才傲物不恃

萬縣志

卷三十六

藝

文志上

文

三十七

勢凌人則又與物爲春飲人以和者邑有魏明經善  
士也立樂善堂以旌善裒然以君居首人皆信之無  
或間言君孝友性成惇宗睦族本根克庇又慮上治  
下治旁治眾則易渙年多則易忘也於是倡首公建  
宗祠並溯所從生自幹而枝自枝而葉纂而輯之彙  
爲家乘以揚先人之功德以大奕世之繼承此誠仁  
人孝子之用心有獨見其大者至於出其才華以宏  
利濟則有辛未之歲饑饉薦臻人多菜色岌岌乎有  
餓莩之患恒苦於計無復之者君則多方籌畫勸捐

拯救不惟族黨得免死亡卽姻戚亦資全活而遠近成風咸相取法則是大有造於粉榆也君舉孝廉後邑人士欽君德行皆欲祛衣而受業於門乃先後設帳於市郭里及賴氏宗祠魏家壩金城寨大河壩等處縣尹聞而嘉之聘掌鳳山書院其課士一以鹿洞爲則先器識後文藝故能多所成就或遊膠庠補博士胥彬彬然克傳衣鉢而樹芳規歲在癸巳延君振鐸者踵相接也而君則願居於山人觀夫山人卽仙也君卽從此仙遊意者君預知其年不永如賈生之

萬縣志

卷三十六

藝

文志上

文

三十八

賦鵬與綜君生平艱苦備嘗天若故靳之致欲博南宮一第而卒不可得則信乎報施或爽而所遇之窮也然遊槐市歌鹿鳴炳外弼中克盡孝廉之實斯亦足以光前裕後可垂不朽而無遺憾矣著有文集行於世君生於乾隆四十二年丁酉歲八月初四日子時卒於道光十三年癸巳歲五月初八日申時享壽五十七葬於花簾子祖塋之左元配張氏生子三長介邑庠生娶楊氏次寶業儒娶吳氏三焯娶吳氏女一適易孫六長永壽次永祺介出次永齡永熾永祐

焯出永祜寶出俱幼銘曰敦實詣兮蘊奇才志未竟  
兮身先摧知食報兮在將來仁見子若孫兮萃冠蓋  
而焜耀泉臺

萬縣賓興會記

邑令 王玉鯨 曉村

余蒞萬三年竊見胸臆羊渠自漢著名大邑今其山  
川猶昔其磅礴鬱積而融結必多英偉之士足以副  
旁求特達之選而已酉辛亥登拔萃科列賢書者僅  
一人焉今年計偕北上惟許廖二孝廉而已何寥寥  
也豈其懷奇負異多士不求聞達甘自匿於魚泉之  
萬縣志

卷三十六

藝

文志上

文

三十九

野大江之濱與毋乃郡縣之勸駕有未周而鄉里之  
勸勉者有未至也夫良玉產於崑崙而寶於廊廟良  
馬生於冀北而貴於天閑雖其材之遇合哉亦資於  
有力而獻之者眾也萬去京師數千里求試春官者  
行李之往來易至匱乏卽錦城秋闈奔走往返僕僕  
道塗間亦以月計寒士艱於資斧其欲前而却步也  
亦固其所且夫射策觀光者多士之志也進賢推轂  
者有司之願也方今

聖天子勵精圖治登崇俊傑慎重科甲遴選務得真才士

之蓄道德能文章者莫不連茹而拔脫穎而出而萬  
人士獨僻處偏隅憚上公車雖本省棘闈試士有老  
死弟子員而不得一與者豈非一邑之不偶而宰斯  
邑者之責與古者大司徒以鄉三物教萬民而賓興  
之州長黨正族師閭胥咸有事焉萬縣舊有鄉會試  
卷貲之助然特撥他公項之餘微甚余故約同官倡  
爲賓興會之舉而呼將伯於好士慕義之紳耆合得  
五千餘金而樂輸者猶未止也爰置良田歲取其入  
以備鄉會試士子之斧資區其多寡分數而條理其

萬縣志

卷三十六

藝

文志上

文

四十

終始勒石以爲久遠不廢之計庶幾南浦英才不困  
於道路之阻長而科甲盛於巴夔也

新修利濟池序

邑令

丁鳳臯

九軒

予市下車求民生利病知城中無井遠汲於江偶急  
需水猝不及應亟詳訪求聞城後北山有泉隨龍遠  
來前邑宰劉君墨韻導引入城注泮池中流繞宮墻  
外滙爲池名便民池久廢詢之龔廣文介三所聞適  
符喜極不及俟異日卽偕介三徃溯尋泉脈及入城  
□□循歷諮度悉得梗概翌日復與介三邀邑紳杜

君峙三同往標誌丈量詳妥規畫自舉人關至北山觀舊跡畧存土石工可參用自北山觀而下故道全失均需石覘舊覘湮棄道旁者僅存三四皆狹薄不堪用工期久固雖因實創籌費匪易爰捐俸百千爲之倡杜君樂助三百千濟成其美紳民聞咸踊躍數日樂輸將及千金乃於某月某日興工由正坎方引入城之元折繞注於泮池復繞二疊注宮墻外池中舊池在廟右久湮茲移鑿於正中再繞乃流出城至某月某日完工除土堰不計外計修石覘若干

萬縣志

卷三十六

藝

文志上

文

四十一

丈合土石工共用制錢若干緡民間泉聲淙淙扶老攜幼爭先快覩無不歡謳鼓舞乃知池稱便民者從民志也所謂便者便其汲之近抱甕者弗病跋涉也便其泉之潔迥異江之濁飲者不虞生疾也且倉卒有備無患不倩巒巴之嘖耿恭之拜也抑知邑無北門得此蔭龍水自北導入以通坎氣非獨芹藻涵滋人文蔚起而消偏亢之氣成旣濟之功無用之用所用至鉅至若居常則挹取不竭遇變則沾溥無窮便於日用便於備用猶其顯焉者也夫有利於民者不

可不興有利於民而又能潛消其不利於民以濟成溥利尤不可不興遂更其名曰利濟池而序其興修本末如此

萬縣新建忠義孝弟祠記

邑訓導 龔

珪 介三

古以死勤事則祀之書舉孝弟祇加旌異

皇朝恢復制邑各樹忠義孝弟祠果名實相符眾論僉同者請於吏聞諸 廷旣旌之復祠之章前徽所以風後起也萬爲鉅邑德厚信仝奕禩諒不乏人顧考諸邑乘崖略失紀並祠亦闕有勤歿王事者惟祀諸郡

萬縣志

卷三十六

藝

文志上

文

四十二

昭忠祠褒顯弗式乎枌榆俎豆未光乎桑梓飭紀敦倫之化固洽興孝勸弟之典仍虛夫至性庸行原盡所當爲初不期章著然比閭聞某某得當道剡揚膺隆禮列享祀共嘖嘖健羨素悉其人熟識其事衢談巷議相與味乎言之謂能如是即可傳當亦盡人能行吾儕胡弗景循勉率風聲所樹莫不鼙鼓軒舞感發興起猗惟祠設所由弼教勵俗型於無朕渠可憇置茲值明經魏君舉孝義復請上憲以邑無專祠飭議設紳耆踴躍醵輸崇建以五月鳩工十一月落成

曠禮闕典翼然九備中設歷代應祀忠義孝弟主祔  
魏君於左而虛其右預券後之袞袞接迹蔚起者  
送魏靜軒先生歸萬縣序 大竹王懷曾魯之

夔巫梁萬之間山崩崩數千仞水澎湃而雷鳴予固  
疑其間必有奇傑好義獨行之士然數以事過匆匆  
未有遇也今乃於魏君靜軒遇之魏君萬縣明經素  
醇謹能爲文磁州宋公大中任萬縣令凡十一月有  
惠政然亦未嘗奇魏君魏君亦未嘗數至宋公之室  
也既而宋公卒於官貧不能歸葬萬之民戴宋公之

萬縣志

卷三十六

藝

文志上

文

四十三

德釀千金賻之而萬縣至磁州水陸數千里宋公有  
老母妻弱而子幼無兄弟親族可倚仗以行者魏君  
慨然奉其老母幼子扶宋公櫬而歸之於磁宋公宦  
蜀久家有薄田數畝屋數楹皆爲族人所盜賣家人  
歸無以爲業魏君召其族人及盜買者至責以義俱  
慚伏歸宋氏產宋氏賴以存夫魏君於宋公生無一  
日之知徒以萬人故匍匐若子弟卒歸其骨而甯其  
人雖宋公之賢使然然率意孤行無所爲而爲之豈  
非當今之義士哉魏君爲宋公治喪事畢遂北遊京

師以六月至將就應京兆試不急於歸也忽一日晨起賃車束裝甚急眾駭其故曰昨夜夢母病吾歸矣眾以試期近慰留之不可請卜之亦不可噫予向以魏君之義爲激於氣今乃見其天性矣眾鄉人留魏君甚苦予曰毋留也使魏君而可留必不爲一故令蹈瞿唐三峽之險戴赤日走紅埃數千里而至此既已至此其不以區區科目之故而一日忘其親也明矣予兄弟皆不識魏君而魏君自言神交久小雲之館於雲陽也魏君嘗乘扁舟攜尊酒訪之琵琶山下

萬縣志

卷三十六

藝

文志上

文

四十四

不遇而返其致趣復如此予高魏君之行而憾相見之晚於其歸也爲文贈之孟子曰一鄉之善士斯友一鄉之善士他日子旋舟峽門因魏君以遊夔巫梁萬山中益求吾鄉奇傑好義獨行之士庶幾復遇之哉

萬縣新建考棚碑記

萬縣訓導

龔

珪

介三

國家設鄉會科目收羅人才先於歲科院試每郡縣各取弟子員隸諸黌宮設師課教儲鄉會試選而院試必先之以郡試又必先之以縣試郡縣試祇收錄待

院試取得失無與也將徒爲之嚆矢乎然 功令所設要白有深意焉夫士先器識而後文藝鄉會暨歲科試惟取文藝暗中摸索不獨識趣莫辨卽其人之狀貌器局亦茫然不知爲何許况以一日判短長於一覽決去取第就文爲衡亦有幸不幸秋風氪氪詎乏英豪哉惟郡縣屢試至四五場歲科並試綦至十場題之虛實文之奇正得畢奏其技並於帖括外若經義若詞賦得別著所長且於進退舉止間審其風度察其氣象其人之器識亦可得其大凡而縣試較

萬縣志

卷三十六

藝

文志上

文

四十五

郡試尤爲親切將試必先甄別流品署行義年其身家不清行止有玷者均不得預試故必縣試錄取達諸郡試乃能進諸院試拔取以儲鄉會試選其登進始基之令典顧不重歟典旣重則關防不得不密體制不可不肅萬鉅邑也歲科應縣試者不下千餘人舊無考棚試諸縣廨無論几案自備擁擠逼仄炎蒸鬱炙風雨飄搖試者深以爲苦而散處陬隅族談擾攘稽察亦弗能周矮屋已足短英雄氣况以訟庭爲矮屋耶前此紳耆羣切經營程工甚鉅屢舉屢輟泊

後集議請諸邑侯按糧捐輸期於必成逮歲餘計貲猶未及半仍作道謀何時眼前突兀見此屋也杜君峙三世好善眾共推屬余偕紳耆往商之杜君慨然弗再計遂獨任其事選勝地構巨材製堅甃鳩良匠於道光十九年三月經始二十一年三月落成共捐制錢一千六百二十三萬餘余從邑侯暨闔邑人士同觀之其外則規模宏敞非徒壯觀瞻俾鵠立以俟者得舒魚貫而入者弗滯也其號舍則高爽俾風日莫能侵陰翳無虞蔽也其號座則堅固俾構思者安

萬縣志

卷三十六

藝

文志上

文

四十六

適弗搖亦期歷久弗泐也其內則清邃俾衡文者偃息得所以怡其神散步有地以豁其目也凡厨竈溷溷莫不涓潔牀榻几案莫不完好小物備矣而崇垣四周閎闔重阻於關防體制尤爲肅密眾畢覽而善之謂掄才旣得地斯鑑拔悉眞才行見科歲登進鄉會連翩掇青紫煥絲綸胥由此儲其選峙三其深知令典所重尤在初基遂爲選佛特闢勝場耶廣廈大庇固君家素願非必以是博名高異日邑中有造五鳳樓手出當緬溯締造襟懷於百尺樓上爲君特置

一榻

新建萬川書院碑記

署萬縣知縣 陸

璣次山

岷江發源於松潘寒盼寨之浪架嶺至夔門四千餘里其眾水別流會之東注者二百四十有奇奔騰泮泮漩沱瀉灘而下至三峽以束其勢萬縣高據形勝西盡郿鄠東攬夔巫爲江水入峽必經之地而南浦匯之故人稠氣聚客帆估舶雲合翔集爲蜀巨鎮而幅幘遼闊亦甲於他邑乃近來人文科第反遜雲開諸縣者此何以故蓋上無振興之道斯下無鼓舞之

萬縣志

卷三十六

藝

文志上

文

四十七

忱非人材相讓也書院之設所以造就人材也萬邑書院昔有南浦西山集賢劉公諸名久廢今東關外鳳山書院乃乾隆初邑令孫廷錦所建道光四年仇令如玉補修璣自咸豐乙卯春下車觀風見其地勢湫隘棟宇偃仄肄業諸生有人滿虞因與范訓導泰衡陳山長光熙甘茂才雨周歷巡眎思廓大之西偏得隙地甚廣詢爲史茂才秋田公業與之商慨然樂助相度梗概綽然有餘乃舍舊而謀新多方勸導以經以營朞年而落成攷萬邑乃漢胸臆縣地自是沿

革曰羊渠曰南浦曰魚泉曰安鄉曰萬州而後周則曰萬川共取義諸水所匯歟於是眾議鳳山之名無甚深義且與大甯同請更之遂額曰萬川書院蓋自唐元宗置麗正書院以聚文學之士爲書院名所自始至鹿洞鵞湖而極盛蜀自文翁石室倡學教化四行儕於鄒魯夫以庠序之外別開石室卽是書院之遺意特當時未專立名而義則所由昉卽謂書院始於蜀可也今定名萬川所望諸生氣宇淵深洗心滌慮文思澄澈月印千潭發爲文章波瀾壯濶蘇海韓

萬縣志

卷三十六

藝

文志上

文

四十八

潮追蹤攝景揚清名於虎觀掞麗藻於蘭臺沾漑藝林爲四方瞻仰不其偉歟抑更有進者士人所重道德功業耳不得已則以著述傳詞章其末焉者故聖門四科德行爲先有文無行相如不免後世之譏文以載道願諸生深體六經之旨實踐躬行則出爲名臣垂勛竹帛處爲善杰矜式閭閻由是而推天下豈有滔滔之勢耶或曰今當鄰氛未靖武備似宜先之則應之曰潢池弄兵吏不恤其民而弛防於未然所致也江湖滿地誰實濫觴當茲團保訓練之際自應

並行不悖固非舉此而廢彼也且宋之范希文明之  
王陽明皆以文士奏績戎行儒將運籌左券決勝則  
士心正而民心自正將見倫紀以爲保障禮義以爲  
甲冑眾志成城堅不可破又何慮外侮之乘耶澄其  
源則流自清濬其壑則沸自止理固然也諸生亦勗  
其大者遠者而已事惟求是碑系以銘其辭曰羣山  
環拱卓彼文峯江濤浩瀚靈氣特鍾洙泗道脉濂洛  
理宗沐其遺澤禮教雍容學貴涵養先求心放景行  
前賢是則是仰蒞典藉墳蔚爲大文步軌賈董抗席  
萬縣志

卷三十六

藝

文志上

文

四十九

淵雲詞源倒峽筆陣掃軍功成心得業在夫勤勤則  
不匱勵志講肄掘井必泉爲山覆簣跳門攀龍追風  
附驥維茲萬州實產琅球明經砥行體用自優邦家  
碩彥基在藏修凡百多士閱此遠猷名勒金石光射  
斗牛亘古不廢如此江流

新立宋五子龕位記

邑令

馮卓懷

樹堂

咸豐八年春二月卓懷旣倡募修治萬川書院門墻  
以葺陸前令未竟之工又置田若干畝准歲所入增  
其膏火復立宋先賢周程張朱五子龕位於後堂率

諸生釋奠焉已進諸生而告之曰在昔堯舜禹湯文武周公數聖相傳之道至孔子而集厥大成萬代而下莫之或尙顧自秦漢以迄隋唐雖經諸名儒表章崇式然聖道尙未大明迨宋周程張朱五子出而後推闡微言直尋統緒俾聖人之道如日在天中昌黎韓氏嘗謂孟子之功不在禹下卓懷則謂宋五子之功不在孟子下也自科舉取士以來士之讀聖賢書者徃徃爭利祿而遺道學遂若書自書人自人者不知學固所以學爲人五常之性五倫之理皆天命也

萬縣志

卷三十六

藝

文志上

文

五十

孔子修道以立教宋五子因教以明道諸生旣讀其書矣其可岐而二之置身爲道外之人哉夫十室之邑必有忠信萬於全蜀爲大邑士氣尙淳諸生誠能讀書學道由士希賢由賢希聖以無負

國家建置書院與有司籌增膏火諄諄造士之心其造詣誠未可量也已諸生欣然而退余因叙次爲之記

卯峯書院碑記

邑令

馮卓懷

卯峯書院西夏先生注經舊塾也先生姓何氏名穌字息夫學者稱爲西夏先生嘉慶道光年間先生致

授於此歿卽卜葬其後所著周易六卷春秋傳說四卷大象穀語各一卷奧衍宏博業經刊播金生維斗等卽其地募建義學延先生之姪貞介授業焉以山形對峙若兩髻然故顏之曰卯峯書院余維先生窮經力學姓氏不甚顯於時顧所著卓卓可傳又得拓其舊塾爲書院則後學者禮其堂式其墓讀其書安知不景仰潛修宏鋪經義益以衍教思於弗墜而大啟人文也夫立鄉學表宿儒存遺書勵後進是誠有司之事而居是邦暨爲之後者尤未可或替也已其

萬縣志

卷三十六

藝

文志上

文

五十一

經理人名及輸助錢穀若干數例得備書勒於碑

太和書院碑記

邑令

馮卓懷

古之教者家有塾黨有庠術有序國有學蘄於化民成俗意深且遠後世省會郡邑之地功令各設書院養士育才而鄉閭士民建立義學興教一方亦所以佐助文化引翼寒雋猶古庠塾之遺風也余治萬三年於邑治萬川書院續募經費增益膏火與諸生講藝勵士士之秀而文者咸莘莘焉繼又督同紳上眾建卯峯鄉學規制告成而余氏茂林率其子孫羣從

獨建太和鄉學工費至六千緡以上夫十室之邑必有忠信萬邑幅員寥廓人思嚮善儻並如余氏者立學鄉閭詩書絃誦以陶淬夫中與才而其不中不才者亦皆聞風觀感革澆薄而還淳厚是則治斯土者所爲欣喜願望勸誘鼓舞於無窮者也豈惟余氏一門實嘉利之是學經始於咸豐九年春二月落成於秋九月所有工值及捐田置田之數例得備書

安懷所續增粥田碑記

邑令 馮卓懷

邑治水陸交會地狹而人稠農工商賈各營職業其

萬縣志

卷三十六

藝

文志上

文

五十二

貧不能自存老弱提挈蹒跚乞食者時時有之而歲暮風號饑寒並迫見者尤惻憫焉夙有彭乾元者捐值五百緡房屋二十八楹爲隆冬施粥之地名曰安懷所又募金置產歲得租四十石益以杜祥捐租二十石准其所入給之餓者蒙袂輯屨貿貿然嗟來食也然歲入不能如額而及時勸募支付多艱則施粥之舉浸行浸止余與學博范君宗山商諸士紳倡同續募前後共得錢二千一百四十緡增置田畝於是費用饒而施粥得竟三月云昔張子西銘以疲癯殘

疾鰥寡孤獨爲吾兄弟之顛連而無告夫無其告者無其事矣而有其事者又每不克終人心善敗之幾民生利病國是休戚之故徃徃而是不深足慨耶此邦好善有徵吾願後之踵是事者經理秩如勿俾廢墜是則仁人君子敦善行於弗怠有合於西銘之旨而余與范君所爲咨嗟太息願望於無窮者已咸豐九年冬月知縣事馮卓懷記

芑溪義渡碑記

邑令馮卓懷

芑溪發源高粱山自分水嶺東流歷十二灣曲折迤

萬縣志

卷三十六

藝

文志上

文

五十三

西復南流以滙於江水經注所謂池溪口者是也城西故有二橋通濟往來其由城南達南津市者秋冬徒杠以度春水至則並舟聯筏長繩拽之夏漲泛潦呼舟益多邛須益甚行旅苦焉邑人士醵金設爲義渡復募置田畝以供造舟理楫舟子月食之費於是眾乃稱便夫好善人之所同規畫蘄於可久易曰貞者事之幹也非貞罔成非幹罔固萬人士樂善從公是舉尤符眾望於以佐官政之所不及而普利濟於無窮可不謂難與經事者以碑文請余故樂爲記之

其捐資人數暨置田所在應得備書於碑咸豐十年春二月知縣事長沙馮卓懷撰

黃柏溪義渡

邑令馮卓懷

邑東與雲陽毗之黃柏溪余家嘴蓋南北通達渡江處春夏水漲江平扁舟竟渡秋後水落兩渡置舟以濟行者先是居民熊承芳之祖名倫自乾隆間承充船戶其後遂據此渡爲私遞相典售循致涉訟余得其情力破除之於是始諭眾姓捐資公置義渡與熊族之已捐置業者分而合夫待濟人孔多矣何私於

萬縣志

卷三十六

藝

文志上

文

五十四

熊熊氏捐資亦眾矣人之欲善誰不如我其肯以眾人輻輳頻仍之地不悉經營俾得誕登先岸哉事成諸在事者議刊善後定程及捐資數目因標其大略於首咸豐七年腊月望後知萬縣事長沙馮卓懷記

馬將軍祠記

邑令張琴鶴齊

同治紀元三月十有八日輔廷馬公戰死縣屬紅谷田事聞

詔於原籍建立專祠嗚呼公之死可謂重於泰山矣公少貧失學雖以小藝生活而有志咸豐六年公赴

鄂入霆字營隨郡人鮑公超勦粵逆於楚北皖南間  
從征五六年身經百餘戰無少挫起自營卒論功洊  
授協戎元年春回籍省墓時滇匪藍逆竄川東署縣  
令余君居寬訓導范君泰衡請於駱制軍檄公畱籍  
防勦公於鄉團中取五百人爲營訓練甫 月賊犯  
忠屬汝溪逼縣境公卽日率勇倍道而進沿途號召  
團練將禦賊於忠之四望山團練未集乃營於紅谷  
田賊乘夜突至公令開壁迎擊而眾爲姦蠹所持不  
應命公怒曰不出戰則賊將蹂我桑梓且徑趨縣城

萬縣志

卷三十六

藝

文志上

文

五十五

吾何面目見安鄉官民也遂從後營門出大呼從我  
戰者重賞有奮勇百數十人從之接戰未久賊眾數  
萬分股抄圍我寡而後無應援遂陷陣公手刃十數  
賊身受三十餘傷死之相從之勇皆戰歿越日獲公  
屍面如生嗚呼公之死可謂重於泰山矣余後八十  
日抵任旋奉文建祠會寇警籌防勦未遑也去年夏  
爰卜宅於東關外陸續籌經費今年春鳩工庀材高  
其閘閔峻其墻垣以塗以垸踰月落成共費三百餘  
緡中龕祀公而以同時殉難並邑人之死事者附祀

其左右嗚呼公豈必以俎豆鄉邦爲重而余必欲亟成之者秉彝之好人有同情且將以是爲廉頑立懦之舉興起百世以下之人心豈僅爲邑人勸哉公歿之年九月滇匪周逆大股犯境往來大周里山後余選團練中之可用者分布守禦而自率一隊越境迎擊獲其目賊受創遁散維時邑中團練勇悍奮發儻亦有所觀感而然與嗚呼軍興以來邑人以步卒起爲協鎮而又驍勇善戰卒能保全鄉里見危致命者公一人而已爰彙次公之大端記於石爲之嗚咽流涕思將才之難得而重悲遇公之終疎也同治四年十二月

萬縣志

卷三十六

藝

文志上

文

五十六

桂宮碑記

邑令

張

琴

鶴齋

余治萬之又明年值甲子科帶補辛酉鄉試始與儒學范君謀舉賓興禮於署門之內是時應科舉者百二三十人中中式者三人武科一人

國朝二百餘年惟康熙三十五年稱是於戲盛矣古者人材之盛衰視乎官師之扶植前此令斯邑者亦旣隆學校蔚人文矣而賓興之典蓋闕卽余與范君斯

舉亦第率成之後之日或者其罔有定處以廢儀文而鄉舉之踴躍科名之騰達或弗盛於今日邦之人蓋拳拳乎此也於是越年而桂宮成宮故爲文昌廟隙基嘗作行臺館傾圯不治余與邦人士相度之用復其基而作宮以祔於廟建屋宇二進四周凡七間積八千四百工費錢二千壹百餘緡其良材堅甃凡一十萬有千百以同治四年三月起修十閱月而工成宮有廳軒楹檻有峭亭飛樓迴廊洞壁有賓客之位有燕飲獻酬之所山影江光之出沒瑞鳥祥魚之

飛躍與夫四時花木爭媚物華者胥於是乎在植桂樹十百本蔭翳其中亦棫樸菁莪之遺意也故名之曰桂宮夫此未爲桂宮時滇逆竄萬城邑烽燧相屬所在深堂邃宇焦於賊炬者徃徃而有而茲地蹂踐蕪廢亦爲兵人所屯積今蜀難旣平邦境安堵故余得改建斯宮以爲賓興地而諸君子亦樂成余志無孰懈以中止亦以見邑人之趨公赴義猶維持文治於不衰幸余他日去萬俾後之賢者於茲有所感觸以時賓其賢良其墻宇無頹於風霜其人物相與栽

培而興起庶幾典禮勿墜以副

聖朝作育人材之意或曰桂文本也文物蕃則世道昌其中興之望歟余既竣事謹記而勒諸石

萬縣重刻四種遺規序

邑訓導

范泰衡

宗山

吾鄉孝義陳敬齋明經倡爲書會若嘉言懿行有裨風教之冊收付劄牘氏者凡數十種邑士紳家傳戶誦志趣爲之一變予愚頑者亦有警動焉雪橋牛明府之蒞吾邑也先教化後刑罰嘉書會能助牖民式敬齋之廬而進諸生以遺規四種予時射策都門未

萬縣志

卷三十六

藝

文志上

文

五十八

與聞及報罷反里閭而新書已出布遍樓峯矣然則敬齋之善書待明府而增價明府之善教與榕門爲一條其鼓舞變動奚翅隆城也歟憾予讀是書開卷勃勃躍躍然若有一今吾在迨釋卷而又依然故吾然吾懼并此故吾而失之久且亡其勃勃躍躍者而不自覺也故常挈以自隨廼者司訓南浦有課士之職而身不足型言不足聽予心實滋愧焉欲與諸生講論遺規且廣其傳庶幾乎不能訓士者訓士之一藉惜又因循未果成均譚岷瞻見此書而悅之請募

資重鐫予嘉其勇於倡而慮其和者寡也乃挽成均  
魏燕巖與共事燕巖之父以獨行入忠義孝弟祠嘗  
刊遺規一二種於樂善堂故燕巖喜繼其志襄其勤  
者茂才李月齋也正其魯魚帝虎者貢士魏小湖牟  
燕山也眾擎易舉不數月而四種全集成四種者曰  
訓俗曰養正曰教女曰從政桂林陳榕門先生撫吳  
時輯也中丞  
本朝柱石其遺烈載

國史其祀典列賢良而其輯是書也則尤精神貫注於

萬縣志

卷三十六

藝

文志上

文

五十九

無窮焉夫百尺之臺非一木之支千金之裘非一狐  
之腋布帛菽粟用不同也而同利養身遠志當歸味  
不同也而同利却疾故彙羣言以教人者教人之忠  
也彙羣庸言以正俗者正俗之善也其用心周其取  
善慎其纂言非兩廡大儒之語錄卽歷代鄉賢名宦  
之典型其博采旁蒐一以不詭於四書六經爲的故  
苟便於教雖巾幗之垂訓可存苟遠於道雖百家之  
鳴道不錄故上不蔽於高遠下不病於淺狹君臣父  
子昆弟夫婦朋友之倫於是乎明誠正修齊治平之

道於是乎著後世選集雖繁蓋未有若斯之善者也  
謂之遺規誠乎其爲規也夫木受繩則直器受矩則  
方豈但已哉假舟車者非健步也而行水陸加羽礮  
者非勁竹也而入堅深夫遺規者亦身世之羽礮舟  
車也然則垂之無窮者陳中丞之良軌也流之愈遠  
者牛明府之遺風也其鼓舞變動又奚翅萬州也歟  
人之欲善誰不如我今不待倡於上而事成於下窺  
好義樂善隱微若使夔巴庸蜀之士有一不誦榕門  
之輯者而其心不願也豈司鐸之力歟由是觀之吾  
咸豐六年重陽後三日樓峯范泰衡謹序

馬將軍傳

藍翎訓導

杜煥南棠村邑人

將軍姓馬氏諱定國萬縣人其初甚貧薙髮爲業喜  
拳技好飲酒醉輒毆其曹粵匪寇東南去應統帥多  
公募爲卒未幾隸鮑軍鮑公起行間數年佩元戎印  
綬一軍凌厲無前動有功將軍與焉數率一隊乘醉  
出走黑夜直薄賊營拔其壘旣捷然後聞主者□□

時用以摧陷堅陣鮮不破每戰必先飲酒拔一螯臨曠野大聲馳下未嘗撓敗以是累功遷副總兵官將軍爲人勇敢自豪然敏機智能應倉卒事嘗從大軍徇某地有難民數百共詣軍門白狀乞自効雖大帥亦將收納之將軍跪而進謂是皆以一日新沐者不可信大帥心動俄偵知實賊所爲數百人者悉收斬我軍遇大敵悍賊數十萬人大帥坐帷帳擊珊瑚頂磁盤者一人侍指謂左右誰爲我出死力破賊者以予若取其一搓手掌中轉圜幾徧眾莫敢仰對移時兩

萬縣志

卷三十六

藝

文志上

文

六十一

人進跪言曰唯主帥令然戰勝當共兒郎等俱受賞一人何敢承帥拍手稱好男子者再其一人則將軍也乃撥予麾下數百人衝鋒出入竟大勝賊所歷兵燹地曰吳曰楚曰豫曰粵凡數十戰以某年請假歸會滇匪擾蜀中蹂踐新梁諸鄉萬人方日謀守禦未暇議戰也乃共請將軍以五百人屬焉然上皆新募不可用又雜以市井無賴部署未定而賊警至急出屯紅田數日而將軍率百餘人戰歿死矣死之日土人據南阜觀者見賊矛百十攢刺將軍流血被頭面

猶持夫刀揮殺十數人然後仆百餘人亦皆死而潰  
卒趙四者云是日謀者皆稱賊遠中夜驟至將軍方  
醉卧未動遽起提刀開壁迎戰兩足猶赤其敢如此  
事聞贈總兵予祠祭鄉人至今悼焉子一名祿昭襲  
騎都尉職

增修萬縣志卷三十六

藝文志下

詩 賦

少陵太白樂天東坡山谷石湖放翁俱嘗至萬萬志所登宜多宏篇巨製乃舊志惟載山谷石湖放翁數首太白雖曾讀書西山惟傳大醉西巖一局棋之句本集不載少陵西山三首郡志收入萬解杜者多謂作於成都送鮮于萬州一首又誤爲鄭谷作子美名遂不登斯志矣至樂天之寄題四望樓南賓郡齋寄

萬縣志

卷三十六

藝

文志下

詩

一

楊使君及答楊使君登樓見憶初登東樓寄楊八使君和楊萬州諸作東坡之過木樨觀詩載在集中有目共覩而亦遺之眞所謂摭拾星宿遺羲娥也况摭拾者落落星宿所漏尙多耶茲悉採諸名作載入亦足壯觀矣惟七賢堂所刻篇什甚富二詠亭其時倡酬極多今皆失傳諸老風流文采輝映山川衣鉢流傳膏馥沾漑故自不乏乃訪求邑中名宿遺稿竟不可得舊志所錄殊未能稱意也

送鮮于萬州遷巴州

唐

杜甫

京兆先時傑琳瑯照一門朝廷偏注意接近與名藩  
祖帳維舟數寒江獨石暄看君妙爲政他口有殊恩  
郡志此詩舊志誤爲鄭谷作

寄題楊萬州四望樓

唐白居易

江上新樓名四望東西南北水茫茫無由得與君攜  
手同凭闌干一望鄉

答楊使君登樓見憶

白居易

忠萬樓中南北望南州煙水北州雲兩州何事偏相  
憶各是籠禽作使君

萬縣志

卷三十六

藝文志下

詩

二

和萬州楊使君四絕句

白居易

競渡

競渡相傳爲汨羅不能止遏意無他自經放逐來  
憔悴能校靈均死幾多

江邊草

聞君澤畔傷春草憶在天門街裏時漠漠淒淒愁  
秋滿眼就中惆悵是江蘼

嘉慶李

東都綠李萬州栽君手封題我手開把得欲嘗先悵

望與渠同別故鄉來

白槿花

秋薜晚英無艷色因何栽種在人家使君只別羅敷  
面爭解回頭愛白花

南賓郡齋卽事寄楊萬州

白居易

山上巴子城山下巴江水中窮獨人強仕爲刺史  
時時竊自哂刺史豈如是倉粟餒家人黃縑裹妻子  
莓苔翳冠帶霧雨霾城雉衙鼓暮復朝郡齋卧還起  
回頭望南浦亦在烟波裏而我復何美夫君猶滯此

萬縣志

卷三十六

藝文志下

詩

三

初登東樓寄楊八使君

白居易

山束邑居窄峽牽氣候偏林巒少平地霧雨多陰天  
隱隱煮鹽火漠漠燒畚烟賴此東樓上風月時翛然  
憑軒望所思目斷心悁悁背春有去雁上水無來船  
我懷巴東守本是關西賢平生意不淺流落重相憐  
水梗漂萬里籠禽囚五年新恩同雨露遠郡鄰山川  
書信雖徃復封疆徒接連其如美人面欲見杳無緣  
送秦鍊師歸岑公山

唐  
李羣玉

仙翁歸卧翠微岑一葉西風月峽深松徑定知芳草

合玉書應念素塵侵閒雲不繫東西影野鶴甯知去  
住心南浦蒼蒼春欲暮落花流水怨離琴

寄南浦遷客

唐 鄭 谷

多才翻得罪天未抱窮憂白首爲遷客青山繞萬州  
醉歌梅障曉欹壓竹枝秋望闕懷鄉淚荆江水共流

岑公洞

唐萬州刺史 馬 冉

南溪有仙澗咫尺非人間冷冷松風下日暮空蒼山  
岑公洞

宋萬州刺史 趙善贛

真人渺何之恍惚不可見洞居獨嵌空壁溜明珠濺

萬縣志

卷三十六 藝文志下 詩

四

藤羅含溟濛竹柏鬪葱蒨至幽合人心遠翠落江面  
野老乘藍輿使君肆清燕日影砌下倒雲容坐間變  
大小巖欲傾邃壑路微轉崢嶸施屏風點綴成綵絢  
雖云急亦樂勝賞殆未遍欲歸重盤旋拂石看古篆

過木樨觀

宋 蘇 軾

石壁高千尺微蹤遠欲無飛簷如劍寺古栢似仙都  
許子嘗高遁行舟悔不迂斬蛟聞猛烈提劍想崎嶇  
寂寞棺猶在修崇世已愚隱居人不識化去俗爭吁  
洞府烟霞遠人間爪髮枯飄飄乘倒景誰復顧遺軀

題西山臨江亭

宋張俞

南浦逢除日天涯有去舟蠻城和雨閉峽水帶春流  
不負新年感惟多故國愁甯無賀新酒徒此事羈囚  
南浦

宋寇準

春風入垂楊烟波悵南浦落日動離魂江花泣微雨  
建中靖國元年三月萬守高仲本宿約遊岑公洞夜  
雨達旦戲贈小詩二首

宋黃庭堅

肩輿欲到岑公洞正怯衝泥傍險行應是岑公閱清  
境春江一夜雨連明

萬縣志

卷三十六

藝

文志下

詩

五

蓬窗夜靜雨如澗好似糟牀壓酒聲此日岑公不能  
飲吾儕強健可頻傾

岑公洞

宋范仲黼

石壁虛涵雲氣深水簾簌簌墮璆琳客來但愛幽棲  
好誰識岑公萬古心

岑公洞

宋夔州通判陸游

大業征遼發閭左軍興書檄煎膏火此時也復有閒  
人自引巖泉拾山果

後六百歲吾來遊洞中正夏淒如秋乳石牀平可坐

卧水作珠簾月作鈎

十年神遊八極表浮名坐覺秋毫小試問岑公迎我  
不鶴飛忽下青松杪

萬州放船過下崖小畱

陸游

畫船四月滿旗風飲散匆匆鷁首東醉裏偏憐江水  
綠意中已想荔枝紅斷碑零落莓苔遍幽澗淙潺略  
約通一疋甯無好束絹憑誰畫此碧玲瓏

萬州

宋四川制置使

范成大

晨炊維下巖晚酌艤南浦波心照州榜雲腳響衙鼓

萬縣志

卷三十六

藝文志下

詩

六

前山如屏牆得得正當戶西江朝宗來循屏復東去

此萬州形勢也惟親  
歷者乃知此言之工

官曹依岩樓市井喚船渡瓦屋

仄石磴猿啼鬧人語剔核杏餘酸

原注土人賣杏皆  
先剔其核取仁以

為藥

連枝茶賸苦

原注土茶甚苦不簡  
拆枝葉雜茱萸煎之

窮鄉固瘠薄陋

俗亦寒窶營營謀食艱寂寂懷磚訴昔聞吏隱名今  
識吏隱處

下巖寺

宋

喻汝礪

益州人

徑向山腰轉門從水面開片雲巖下宿一鉢朔方來  
落日鳥衝樹輕雲花覆苔惟應荔枝熟時躡白雲回

路暗松杉密  
天空霧雨開  
山容依檻轉  
鳥影渡江來  
汲水僧歸寺  
啣花鹿印苔  
年年蠶麥熟  
貧道啜齋回

宋萬州刺史 馮時行

泉細或疑雨  
岩深微見天  
暫來如可老  
長往不難仙  
石髓層層落  
松聲樹樹傳  
欲歸重回首  
明月傍船舷

宋夔路運判 查 籥

滿目暮山平  
遠一池雲景清  
酣忽有鐘聲  
林際直疑  
夢到江南

岑公洞 宋 郭 印

萬縣志 卷三十六 藝文志下 詩 七

岑公來避世  
甲子十周年  
夏屋虛巖豁  
神芝結乳懸  
木藿從古種  
香杏至今傳  
學道能堅忍  
何人不得仙

宋萬州刺史 趙希混

自有煙霞護  
石扉更添曉  
色露清暉  
巖前老檜  
吟風  
處似訪仙翁  
化鶴歸

岑公洞 宋 陳 邕

武陵種桃人  
商山茹芝老  
世變百戰酣  
仙境一蹴倒  
煬虐浮於秦  
海寓爭飛匏  
真人避世翁  
知機一何早  
萬里恣遠遊  
一壑供却掃  
人間別有天  
海上應無島

我行經南浦奇蹟事幽討出門霜落木呼渡江空漉  
莫言不能飲笑起同醉倒何以侑我觴泉音玉琴操

岑公洞 二首

明 盧 雍

虛中得清境病裏適閒心蘿月窺仙夢松風入醉吟  
春明野色遠晝靜水聲深莫謂幽巖僻依然白日臨  
挽駕離塵境尋幽養道心石芝含古色風竹和清吟  
天闊遠峯秀雲多古洞深浮生百年裏誰解一登臨  
岑公洞

明夔州知府 許應元

赤日欲行且復留縣宰期我城南遊輕風棹歌絕江

萬縣志

卷三十六 藝文志下 詩

八

水咫尺便涉方壺邱蘿溪竹徑何屢羃石室崖扉忽  
森瑟乳泉滴瀝朝出雲琪樹籠葱晝含日簷前偃僂  
窺邑井泱波淪沔浴奔景花嶼晴棲巫峽烟笙臺暝  
接青城嶺昔人已去姓空存池上猶餘洗藥盆應指  
桑枝原是海却栽桃樹自成林余悲城市不可住日  
暮猿啼當復去淹留迫鄰山鬼宅彷彿安知羽人處  
蓬萊方丈信依微湖上青山待拂衣明發還應牽簿  
領巖前只有白雲飛

岑公洞同王引瞻少參賦

明 陳文燭

仙子何年去還餘洞口香白雲頻下鶴紫氣總飛羊  
列岫橫江浦鳴泉到石床故人斗酒會夜色正蒼蒼  
春日偕高貞菴節推遊岑公洞  
明 郭 棐  
夔州府  
岑公古洞碧山旁忍草禪枝幽思長泉噴玉龍珠滴  
滴霜凝金雀樹蒼蒼來游喜值春初艷覽境偏憐鬢  
易霜最愛能詩有高適不辭刻漏到華觴

萬縣廣濟寺

二首

明 黃 溥

西山蘭若世塵稀殿閣玲瓏鎖翠微珠樹月明元鶴  
下紺林雨過白雲歸久知身外名無用暫識空中道

萬縣志

卷三十六

藝

文志下

詩

九

有機何日乘驄重過此不妨吟賞到斜暉

天生橋

明 杜應芳

靈根穿地起神斧劃天通龍卧雷奔壑鯨吞雪瀆空  
平能舒險仄堅不受磨礮應與銀河接還期黃石逢  
白鶴寺

明 郭欽華

迢遞檐帷入翠微林深古寺逗斜暉山連雪岫搖青  
漢城帶溪雲護遠扉撫字不須論虎渡生涯終日有  
魚磯徘徊忽見雙鴻起吹落松風滿客衣

鹽場

明 黃 衷

川東十數州此地事征榷  
齟賈浮大航蠻賈日交錯  
算緡及銖釐刺穎倒囊橐  
追惟作法誰主者乃倅幕  
先王御盛世賦稅且云薄  
末造計舟車諒非明哲作  
錐刀將盡爭何以求民瘼  
厲禁如可除商旅永和樂  
壤塗早發壤塗卽灤渡距縣治九十里國朝 王士正 阮亭

夢迴峽月落卧聽舟人語  
風便五更潮天明到南浦  
萬縣有感 王士正

千秋南浦地險阻控三巴  
惡少仍雕面通侯各建牙  
原注謂慕義向化二侯何人飼豺虎吾道一龍蛇  
鼓角寒城暮

萬縣志

卷三十六

藝

文志下

詩

十

江流捲白沙

岑公洞

王士正

岑公昔學道遺跡空山中  
洞門界飛流白日生雷風  
石髓無今古鍾乳盡玲瓏  
巖泉日穿穴點滴成窪窪  
中央若纍棋狡獪造化功  
頽竈倚青壁中夜丹砂紅  
睠彼遺世翁於此悟參同  
壁間題字人歲月何怱怱  
巨碑亦笏立文詞競豪雄  
中間岑襄州頗擅語句工  
豈其南陽裔源流故難窮  
此洞與魯池望望江流通  
昔是仙靈宅今爲豺虎叢  
太息下山麓風健孤帆東

自注元符間岑巖起像求虛鑿真入贊一碑李廌方叔所書岑洞魯池今皆爲侯家所有築砦其上

白水谿

國朝

張問陶

船山

大石不受谿谿水出其背散如萬斛珠破櫝一時潰  
琤琮響碎玉襜褕聚飛鷺撲簌千點雪溟濛十里霧  
君不見年年五月風雷吼急雨騰山白龍走

由湖灘至蛾眉磧

張問陶

劈痕滿山根水力猛如斧灘頭起盤渦峯勢爲飛舞  
大壁如連城小砦若環堵層層寶樓閣黯黯破廊廡  
一石宛然塔頽岩聚成隄低昂人獸雜缺落丹青古

萬縣志

卷三十六

藝文志下

詩

十一

過眼倏萬變職方不能數頗聞開國初譚氏多如虎  
魯池岑洞閒千里鳴金鼓悠悠百年來子孫恥言祖  
一笑向化侯爾曹直腐鼠

萬縣小泊是日立春

張問陶

東巖鐘磬寂春色有無閒爽朗三層閣玲瓏一縣山  
江迴巴峽斷花放苾溪閒歲晚鄉愁劇船窗午夢還  
巴陽峽

張問陶

萬石束江江愈狹一線寒流細於聞撇漩捎歎輕欲  
飛扁舟欵過巴陽峽撻金伐鼓上水船大帆如腹風

幡然百夫牽挽三老急難進易退危可憐小人得意  
每忘死君不見上水船如古君子

萬縣

國朝 李鼎元 綿州人

小湖平大湖橫犀角風生愁煞人

萬縣雜詩 二首之一

李鼎元

路入巴東何處好萬州郭外最清奇南山雲接北山  
雨正是寒江欲暮時

蛾眉磧

李鼎元

仲春暖似夏初時萬縣桐花開滿枝夜半山岬殘月

萬縣志

卷三十六

藝文志下

詩

十二

吐一痕沙磧畫蛾眉

岑公洞

國朝 王原相

一去蓬萊別洞天凝然空守護雲眠蓮花擎出金莖  
露瑤草長開玉宇烟煮石尙留當日井飛羊應結此  
中緣琅玕珠藥無心拾盡化人間灌芋田

李少泉明府招遊岑公洞漫賦

國朝 張文耀

翠壁峻嶒勝地偏披尋吾欲問逋仙山中猿鶴堪爲  
侶石上藤蘿不計年古洞雲深凌白日玉芝春老灌  
飛泉人間吏隱誰能識君有雙鳧跨紫烟

灌芝泉

余 价  
巫山人舉

幾處泉分百道流  
洞天甲子度春秋  
等閒莫遣人間去  
惹水生波逐浪愁

自萬赴開州別駕任途中雜詠二首  
程正性 邑人

帝京多景物今日作燕遊  
萬里難爲別孤身孰與儔  
山棲誠計拙捧檄豈生謀  
駟馬橋頭路何人爲置郵  
聖明垂異數開府促行裝  
自是恩逾格甯論道阻長  
雄關穿虎豹山棧歷冰霜  
遊紀從茲始毋忘蜀錦囊

曉發萬縣 任川東道作  
兩江總督 陶澍 雲河

萬縣志 卷三十六 藝文志下 詩 十三

萬壑千岩屹水濱  
如花如火望中新  
便疑一葉江邊路  
已是三山海上身  
月到西巖猶有夢  
地經南浦易移神  
凌晨起柁雲安去  
更試曛人麩米春

岑洞水簾 萬縣知縣 劉高培 臺峯

幽人列太虛  
漱石鈎元牝  
萬籟寂無聲  
捉芝頤自哂  
仙風冒碧棖  
真氣吸銀脰  
秘守黃庭訣  
至今權約穩  
蛾眉積月

大塊出隴岷  
靈峰點蜀宇  
蘇公憑弔來  
筆海滙南浦  
蟾影戀冰綃  
雲根繞玉柱  
千年璧不瑕  
隱見蒼苔直

玉印中浮

天雯飛寶篆地脉蠹靈蚪嵌水儼新佩掖雲如繫肘  
唇樓星欲就虬壁髮還紐千載淘金鑑眞文終不朽  
長虹橫波

蜿蜒勢欲拏春漲壁流注夾岸影桃浪凌空結彩霧  
天成何斧琢絳甃絢元素仙客騎鯨遊聊同飛鳥晤  
曲水流觴

學士重相知怡情及澣凟浮杯捉月來飛羽乘槎至  
酣興峽浪迴傾斗灑瀕漬願與蘇黃偕臨流載舉觶

萬縣志

卷三十六

藝

文志下

詩

十四

秋屏列畫

玉宇依空浮移來映水墨天工欲繪景碧落綴顏色  
嵐氣時深淺月娥加組織清風待有便噓拂此消息  
西山夕照

靈柱挂龜茲斜陽不敢徹倒曙甯無心迴光意更切  
朝霞競爽過晚霽在金凸長挹西峰翠笑看魯戈擎  
天城倚空

塵郭啟雲端樓殿出海曙紫翠層迴環瓊光日轉助  
波瀲雉尾搖山趨鳳翎翥造物闢奇境恒思帝居固

岑洞水簾

萬縣知縣 丁鳳臯 九軒

石室藏眞地丹還不計年層岩仙瀑瀉半壁水簾懸  
鈎轉蟾光老珠跳鶴唳圓勝遊消永日回首白雲眠  
蛾眉磧月

江臯留勝蹟片月卧修眉雲捲匳開處潭澄鏡展時  
黛環山聳翠波動柳生姿合浦珠添媚相輝景倍奇  
秋屏列畫

山勢屏風列秋光如畫圖金螭環水榭雲母障城隅  
翠積晴嵐染丹流夕照鋪十聯詩可繪妙筆待倪迂

萬縣志

卷三十六

藝文志下

詩

十五

曲水流觴

雅咏賓朋集碑傳姓字芳山川留勝蹟天地放疎狂  
聖樂賢應避湍迴水亦香蘭亭佳景共逸興說蘇黃  
長虹橫渡

飲澗飛虹落仙橋亘古橫有人皆鶴跨無石不天擎  
挈貳疑朝雨縹綃逗晚晴江淹文可賦南浦望霓旌  
玉印中浮

地寶形惟肖中流玉印陳金相鎔水麗古篆護苔新  
月照輝騰匣竿投紐繫綸墩堪如砥柱灑灑錦江春

西山夕照

西山迎爽氣霽景夕陽殷散綺收前壑餘霞浸一灣  
脚垂新雨歇舍返片雲閒明月招邀上詩仙映醉顏  
天城倚空

萬仞奇峯設凌虛氣象雄如墉憑地險累卵自天工  
鳥道餘丹壁松關款碧空星辰梯接步引覽極巴東  
岑公洞

丁景森  
松階

避世存真處蓬壺小洞天廿年方外納萬古靜中緣  
液注芝泉活花拈石蕊鮮仙踪今宛在丹竈護雲烟

萬縣志

卷三十六

藝文志下

詩

十六

偕阮小臺遊太白岩

丁景森

仙洞凌空鎖翠霞攀蘿躡磴石枒杈天台偶入丹山  
路雲液新烹紫筍茶袖挹浮邱評佛老詩捫古壁動  
龍蛇憑高且放看花眼桃李春深罨一衙

登太白岩

阮琳  
小臺

君不見崑崙之山高插天罡風吹下九點烟一烟散  
作南浦雲天矯蜿蜒生龍紋意氣不欲隨蹲靡耳孫  
風骨蕭蕭起謫仙一見勢傾倒雲根石罅窮搜討大  
書特書太白岩萬古忽有兩天姥不然錦江處處聳

奇峰何獨此峯生色好山不在高仙與俱支機片石  
留成都而况硯礪離奇邁蓬壺夜郎自大古詩臞偶  
然落墨標玉碣勾攝多少詩人淵淵元元流不竭東  
坡山谷宇宙豪幟樹騷壇甘拜謁一字一珠含修蚬  
兔起鶻落成墨窟墨精化作千蛟螭珠生夜光吐半  
月上有半月岩我來安鄉遂瞻韓丁侯善政覩百端  
公堂獻頌萬民舞稱觥忝附故人歡三月初九日合  
邑爲九軒明府  
送萬民衣傘閒情偶步吾家屐得從大蘇快壯觀與  
不勝枚舉  
軒伯兄松階明府暨  
陳沛蒼先生同登穿花書竹香留袂攀籐跋磴鳥

萬縣志

卷三十六

藝

文志下

詩

十七

道蟠拂苔拭蘚尋碑讀摩挲不厭百回看讀罷豪情  
上空碧古砌丹梯錯疊疊雲臺月館架層巒中有燒  
丹隱羽客九華山泉生秋寒涓涓滴滴輸玉液道人  
嚴守呵六丁老龍渴死取不得客來興酣取次烹盧  
仝七椀細評啜上有老道通丹汞年近七旬而髮鬢  
青青然爲松階所識下榻處有岩泉  
湧出汲以煮茗劇說三潭跡一據天城一都歷岑公  
烹茶待客洞口晚霞飛流杯池頭冷光滴三生石上證前因傾  
鉛鍊汞話半榻孫登長嘯暮雲橫山川風物神爲傾  
廬舍萬家烟霧濕層空捲盡一天晴桃花初泛寒沙

淨遙嵐色映夕陽明樹生鳥語岩齊磨江浮舟楫人  
亂撐花明柳暗雲帆白染成畫本鬪春英其餘蒼蒼  
聳古木槎枒疎淡老無情山迴路轉不知數三峽諸  
峰入指顧猙獰突兀石狀形獅象羆熊若朋附名山  
有癖忘窮通向平情長心忡忡我欲釣六鰲蹋去波  
浮空歎息南山竹長竿未易逢我欲跨鶴背高翔捫  
青穹自分骨格俗雲將無與從願化神蛟排濁浪亦  
與長鯨上下意無窮又恐一身墮落層淵下伏龍潛  
鼉爭相馳逐把臂扶我入龍宮何如側足此岩雄壯  
心胸

己亥夏旱以虎骨投龍潭得雨

萬縣訓導龔

珪介三

方春多愆陽菽麥難樹藝入夏彌炎亢田禾半槁頽  
絳空無纖雲赤地生漲壻蟲蟲倍增驕矚矚益加厲

農夫釋耒嘆婦子焦顏對官吏竭僂俯巫祝徒詞費  
童山未堪焚坊門已久閉豐隆驅弗前阿香車仍滯  
陰石鞭不起土梗藻空繪競鳴沮澤鼓誰釋葛陂繫  
詢謀逮芻蕘旁搜遍典記擾龍有成效桂籍詳載志  
丹桂籍載以虎骨又聞恩太守峽門曾再試虎氣逞  
擾龍致雨甚詳光怪龍窩攪蟄睡□霖果渥降口碑猶頌侈民方不  
聊生神安得處泰□祈旣未應激怒何嫌愍風雲共  
噓嘯山澤宜通氣吼爭纏猛虎用杜金木理尅制雅  
勝燒蛟龍焦腥神淵穢爰乞靈山君購逾駿骨貴耽

萬縣志

卷三十六

藝文志下

詩

十九

眈緬英姿乙威猶足畏傳說石龍洞潮汐日三會修  
鱗中潛蟠村氓常祭禴旦暮禱壇下令君實尸祭同  
寮合分任賢勞資仙尉十日前馬二泉少府冷官有  
熱腸奔走後先暨予白興廉堂明府請用雖無民社  
責夙懷飢溺志自省齋潔久明發亟行邁驅馳六十  
里鬱蒸未覺憊近洞數里遙崎嶇不容騎徒步犖确  
中仍未敢張蓋洞口石角撐齒齒作怒勢稍入凌垠  
堦再進遂冥晦數人熱炬導決往志愈銳嵌竇僅容  
身捫壁徐緣曳沉澗深莫測懸石危欲墜旁通路一

線濕滑更側陂蛇行四五重遙聞聲澎湃陰壑生風  
威萬竅動空籟鏗鎗作怒吼鱗甲恍惚肆鼓勇逾兩  
關絕壁澄潭濺黝碧望無際神物聚族類虔誠默致  
祝敬謹再拜既鄭重捧虎頭長繩親懸鎚浮漚動盤  
渦洶湧忽鼎沸凜乎不可留旋踵潮隨至未遑倩扶  
將健步亟逐隊來徑已沒踝飛濤儼襲背倘恍忘顛  
危踉蹌越重隘羲影微斜映澗流仍潨細出洞涼雲  
生清飈送歸轡薄暮已簾纖乙夜遂滂霈金蛇走不  
停玉虎轟尤異簾溜澈宵鳴寅感喜不寐及朝晡未

萬縣志

卷三十六

藝

文志下

詩

二十

止餘怒懸河霏疇盈水悉活犁發土殊利焦卷蘇黯  
黃穠稔沐新翠四野動歡謳萬彙饒生趣自是大造  
仁弗忍惠澤閱列犧謝神慈鼓腹樂熙世安得貪天  
功謂人力所致誌喜不名亭還諸太空外雨珠詎可  
探逆鱗批不易涉險同履尾回憶心轉悸

太白巖

龔

珪

放出一頭地奇撐仙骨適佳哉特逋峭白也合勾留  
小住構吟舍騁懷凌酒樓盛名獨有屬今古此同遊

天生城

龔

珪

山勢離奇極排空結構殊影沉寒日瘦氣軋亂雲麤  
老樹翠虬偃荒榛蒼鵠呼欲煩巨靈掌鏟作平疇鋪  
岑公洞  
龔珪

遮却隋氛惡獨饒清福多支離如此叟安樂可爲窩  
迹恩羊裘覓路迷漁艇過紫芝化作石采采不聞歌  
回首軟紅隔撲眉森翠迎薜蘿含雨意竹樹自風生  
界證畫禪別趣饒詩味清劇憐新履印蹴破綠苔橫  
常孝婦詩  
龔珪

伯姬守禮死傳謂女不婦茲則盡婦職殉姑非拘狃

萬縣志

卷三十六

藝文志下

詩

二十一

婦本出細微天性亦何厚壺訓夙未聞大義獨能剖  
傳說婦居恆艱苦已備受夫駮謀生難姑老病廢久  
呻吟繩床中轉側需掖肘左右敬扶持晨夕無閒偶  
紡績疲十指竭蹶營升斗奉姑餒其餘忍飢勤井臼  
深恐姑聞知更慮夫慙忸悻嫜志靡他怨嘆絕無有  
夫出外營工婦惟姑是守天災降倉猝大地忽鼎沸  
婦驚起夢中魂飛神茫昧搶呼復何益事急計不再  
惟負姑疾走踉蹌出室內前門已赫烈屋後龔逃避  
葦壁亟推倒孱弱已極頽負姑匍匐行不容更息喙

土壁阻當前勢逼不能退輕身可獨超重負難並濟  
負姑弗暫釋攀躋仍顛墜志決不獨生力盡甘同斃  
遺骸餘燼索重獲咸悚愕枕藉並焦蹠依倚弗參錯  
姑斜憑婦肩婦更姑堅握殮時力擘開臂曲指猶着  
想像狼狽時婦姑蘊念各姑勗婦逃死婦志彌堅卓  
惟恐姑或失回擁力束縛聚觀悉感傷情形緬確鑿  
釀金助營葬公揭請揚推旌表荷  恩綸豐坊樹嶽  
嶽此婦夙本賢閭里無述傳一朝奇節著眾口爭喧  
闐十室忠信具兩閭正氣懸名教講共識至性賦豈

萬縣志

卷三十六

藝

文志下

詩

二十二

偏胡爲篤忠孝乃每出蒙顛

銅印歌

龔  珪

天生城譚宏負隅處土人鋤地得印篆曰鎮守夔巫  
等處前鋒總兵官印考與譚逆僞稱不符疑其私製  
以昇部下者

如許大錯竟鑄成奸狀歷劫猶鐫呈辱金奚足當題  
識聊復刻劃魑魅形當年夔萬誰隅負三譚蹶豎渠  
推宏金甌盡裂無完土殘疆半壁支頹崩潰將紛紛  
走入蜀烏合蟻聚滋呖嘈文督師志揮落日擬鎔頑

鑛金維撐亟請鑄印挈往授連十六鎮同鼎擎都勻  
却奪印勅失口傳天憲加鴻名蛙張井底方自大一  
漿十餅羣狎爭爵進公侯仍故態博呼痛顛終莫應  
戈操同室宏首禍蔑視督師隳齊盟翩然決棄飽颺  
去專建闔別張旆旌擲却故印換新印 寵荷 興  
朝真足榮暫使詐難縣帶礪偶竊器卒羞負乘慕義  
侯印合長綰乃艷僞號將軍稱吟餘上堵莫逃死齒  
冷摩雲終伏刑封狼生羆更蠢動逾紀乃淨鋤芽萌  
磔裂分梨除猘獠盪掃莽穢封鯢鯨鎔鑄雄劍作農

萬縣志

卷三十六

藝

文志下

詩

二十三

器剷削危壘成芳塍此印久當淪糞壤凶欲消盡燐  
潛熒胡爲頑質尙完好藉昭鐵案文分明摩挲磨洗  
前朝認翻令百感方寸增平時刊敝斬莫予豪傑苦  
無尺寸憑事棘乃妄畀么麼麒麟植飾徒彪弮取懸  
肘後等故物下走腰盡黃金橫續狗尾難冠珥給爛  
羊頭亦封號膺竊國者侯闖餘孽金印特錫稱忠貞  
斗大龍虎將軍印漫付淑贊期中興蚤戶番鬼尤猥  
瑣新軍龍武殊囂凌甚至都督緣街走衣冠悉假諸  
優伶不有抗節諸君子弁髦敝棄誰揚靈曾聞何忠

烈印重藐躬輕但期印完死何惜詎意印存死更生  
又聞孫忠襄盡瘁印是承茫茫莫酬填海恨千鈞一  
擲蛟宮驚永昌推官通判俱末秩身碎印卒不可撓  
一月郡守王萬育以身殉印腰綬縈故國邱墟印僅  
在黃公保護心怦怦啟事仍用舊時印堅持故節希  
子卿凡此人足爲印重身與印輒霄同崢此印僞製  
可弗論徒供指摘無光晶丈夫心印在忠孝直貫金  
石留丹誠磨鍊鐵肩擔世事浩氣壯乞成金城兼縮  
並佩何足數但取封侯殊平平

萬縣志

卷三十六

藝文志下

詩

二十四

登北山觀

邑廩生

胡

憬靜夫

策杖出北郭積翠浮天半逶迤一徑升危梯步凌亂  
好風若爲招眾鳥時相喚樹色籠菁葱烟雲紛變幻  
登高一憑眺城市瞰欲徧長江帶郭流小舟同葉泛  
羣山受約束東環拱無厓岸此地昔設險郡城資蔽扞  
高屋建瓴水保障屹無患寄語後來人先事紆籌算  
游岑公洞

古洞何年闢門前挂薜蘿捲簾流水下排岸好山多  
石氣蒸雲出泉聲帶兩過惟餘芝草秀鬱勃老巖阿

胡憬

謁西山太白祠

邑恩貢生 劉用儀

絕塵龕外路遺像拜先生一代詩名重千秋雲氣清  
巖西渺棋局天半有書聲此地昔僑寓風流起後英  
客萬縣

刑部員外郎

范泰亨

雲吉

城郭依山壁人家半石梯偶傳征雁警時有乳鷹嘯  
落日照幢艦中原聞鼓鼙武昌猶轉戰蒿目灑東西  
便民池

范泰亨

山城苦朝汲賴此便窮閭或欲襁裨竈還應號鄭渠  
泉分萬戶北池鑿百年初何事重疏濬仍令挹注虛

萬縣志

卷三十六

藝文志下

詩

二十五

題涪翁記後

四川學政 何紹基 子貞

建中靖國許東歸南浦西山暫拂衣亭榭基荒存佛  
屋龍蛇迹在暎魚磯江南野水夢魂到臣甫杜鵑詩  
涕揮今日中原尙征戰空慙秉節望皇畿

游流杯池至青羊宮小憩和何子貞學使書山谷建  
中石刻後原韻

署萬縣知縣

陸 璣

次山

簡書可畏敢懷歸偶向山中訪羽衣南浦水生搖麥  
隴東風花落冷苔磯流觴序過春將老題石詩狂墨  
亂揮惆悵潢池兵尙弄時望獻馘到京畿

訪流杯池

陸璣

天光澹沱雨晴時路滑泥鬆策馬遲四面好山華着  
水一宵春夢草生池流杯賸有均堂跡脫帽閒尋石  
壁詩輸却涪翁誇健筆往來爭搨建中碑

丙辰既望獨遊太白岩題壁

陸璣

樹梢高處露瑤宮梯石層崖曲折通一道紅闌新補  
景春游宛在畫屏中

岩谷雲多石氣涼在山養性出山忙問誰不受煙霞  
痼隨處安心別有鄉

萬縣志

卷三十六

藝文志下

詩

二十六

石龍洞祈雨紀事

萬縣知縣馮卓懷樹堂

南山老龍洞龍徙自何年一目潮汐三噴薄流濺濺  
夙昔事祭禴神澤賁無偏戊午夏六月苦旱憂焚煎  
民命我爲請詣禱申恭虔入洞經里許曲折勢蜿蜒  
拚死抵靈湫奮勇踰危巔翦髮及手爪投牒訟尤讐  
及出不歸次蓬葦待恩宣連朝雲陣起當午雷車闐  
神珠瞥一擲農畦無滴涓我憤暴石偶幽攻霹靂堅  
更謁岑真人始獲膏雨連盈疇水泱泱吐穗苗稍稍  
農田穫豐稔國稅輸完全回思批鱗逆目眩心旌縣

始入尙通曉一轉陰房鍵爇火照深閭滴漏濡腥涎  
偃仄跨石縫逶迤鳧水邊村厖交護導靈氣慄幽潛  
高或擬升天低則疑墜淵蛇行復蛙躍獠攀而蟻旋  
不記幾盤閒雙柱白玉璇一上拄巖頂一立躋牆肩  
不知何官府扃祕鄉嬛編圓暈神斤削莊巖廣廡磧  
自餘石融液龍鳳獅象然或如搏人鬼或如遺世仙  
或如綴瓔珞或如排戈鋌或如沙磔閒貼地鋪氈氍  
或如榱桷際垂幔拖錦纏如肝腎臍乳如几仗鞮鞢  
如欹坐正席如長鑱短椽奇形並異狀髣髴難雕鐫

萬縣志

卷三十六

藝文志下

詩

二十七

森然動吾魄歸夢猶怖顛呼籲豈不聞儻值老驪眠  
甘霖終普渥寅謝羅牲牲龍兮休怨恫職守難棄捐  
甘霖洞祈雨紀事  
馮卓懷

丁巳秋首令赤旱何蘊隆豆麥不獲種泉脉斷甃硤  
山農向天泣大春吾室空小春更不播微命付蒼穹  
縣尹惡薄德竊祿誠無功顧惟羣黎愚何罪薦饑逢  
齋心默祈禱天門不可通石龍枉呀呀牙角勢矜雄  
請借秦皇鞭振此睡驪鼉及夜霖霖連累月沾洪濛  
耕夫色焉喜鋤耨揮如風嗟余釋縲囚六事責當躬

茲雨豈誠格天意憐困窮尺澤諒難常省疚回和融  
載讀五行傳瀕洞感寅衷

流杯池紀事

馮卓懷

流杯池古修禊事建中靖國遺碑記當時亭榭無一  
存剩有方塘蒔荷芰售爲民業知何代輾轉遂被清  
河置前令嗜古拓荒基立遷塋墓凡三四並劃此塘  
培古跡忍聽腴田竭脂膩大書深刻立之碑轉瞬培  
擊無完字我思興廢何常理含元殿宇今誰治漢唐  
碑碣幾存留况復旁陬奪民利但令山谷龍蛇在碑  
萬縣志

卷三十六

藝文志下

詩

二十八

掇塘還又何異暮春延客引流觴清風習習故人至  
酒闌上馬倏將暝四山遠近堆蒼翠  
遊西山因憩流杯池讀山谷碑

六品藍翎訓導

杜煥南  
棠村

麒麟虬姿尙儼然祇今風雨卧平田憑公逸氣斂山  
色賸石荒荒八百年

南樓

辛酉守城作

杜煥南

守陴日日勸加餐時蹙方知治賦難發箭軍戎依薛  
禮

大昌薛尙品都  
戎助援城中

持籌鹽鐵少桓寬醇醪大社千夫

醉細雨重城五月寒少喜漢豐妖鳥盡謀來聞已向  
長安

賦

便民池賦

國朝  
邑令 劉乃大

天下事之稱便者必其不便於平日一旦舉而更之  
而羣焉愉快者也萬邑依山爲郭取汲於江倉猝需  
水多所未便予爲之相度地宜去城七里之遙地名  
舉人關者得清泉一泓鑿石爲渠引入城內遶學宮  
而注之池民皆稱便因以名池而賦之賦曰

萬縣志

卷三十六

藝文志下

詩

二十九

天一生水地六斯成流長源遠漭漭瀦盈媚珠昭不  
測之象浴日顯至足之情用之無盡取之不爭何區  
區之池沼而詎分乎便不便之名蓋以南浦巖疆治  
開叢麓石級層層民居簇簇盼煙霞之颺渺度岡陵  
之起伏鮮細涓兮紛流總奇峰兮高矗挈瓶若渴鑿  
井奚緣江雖可汲山不出泉頻負重而促登亦循涯  
而僕走躡織堤岸渾如河上之翁機卸桔槔直似漢  
陰之叟此實窘於鮒困涸轍之天而難斲乎偶指宋  
城之手者也又且祝融肆虐靈雨愆期望洋而羨束

手無奇興雲乏術喫酒誰施豈曰式飲絕庶幾之願  
竟爾澹災無匡救之宜予也丙辰之秋調任茲土念  
切民瘼目擊艱苦思遠患以豫防計彌縫而小補詢  
諸僚窠訪及士民既窈窕以尋壑復崎嶇而問津因  
高就下闢萊鋤榛有谷習習有石粼粼滄然而仰出  
者清且冽湛然而濡潤者淡以醇於是捐資命匠竭  
力鳩上不平穿於地下喜高引乎嶺中一脈潺湲石  
邊流出芳沚千層滂沛天上注來清淙鑑開城闈道  
經泮沼翰藻芹香橋門星繞滌洄若帶映檜色之依  
萬縣志

卷三十六

藝文志下

賦

三十

依左右逢源助文光之皎皎餘波鏗爾弦歌在堂一  
泓漾哉皜潔斯皇銀瓶下而齊汲素縵舉而共揚第  
識取攜之順無煩抱甕之忙若夫深可藏蛟明堪燭  
影冬覺其溫夏利其冷眾水皆然非吾所幸愚民好  
逸歷久難持井堙渠塞會有窮時不加修葺悵望空  
池清流不絕永潤於斯是所望於後之君子而非吾  
之所敢知也

便民池賦

邑令

劉高培

自夫天光含曉月影淨瀾珠絡玉葩露滴金盤凝元

精於太乙瀑白練於瓊灘始涓涓而漸被亦浩浩而  
激湍湧雪浪而噴獅吼引虹旌而繞龍鬚爾乃南浦  
北山西折東隈蒙泉吞吐坎液滌迴氣奄甘霖之沛  
澤寢早魃之災控上游於天塹瀉橫碧於地陔落花  
滿溪香襲瀛溝之磴飛雲隔岸彩映蓬池之苔靈鍾  
點潮滴滴流崆峒之雅韻石鼓響籍曲曲譜洙泗之  
育才又且沁沁一勺汨汨盈千拋珠隱蛟龍之穴擲  
鎖穩鰲鯨之天泛濫日出何洩尾閭之窠往續無窮  
終歸星宿之泉維時吾宗墨韻製錦萬川期年爰度

萬縣志

卷三十六

藝

文志下

賦

三十一

形而鳩石規旣鑿地而爲池澶清泚淋壑甘滴溥慈  
惠於鱗巷滂流趨海巨浸弭祝融於蜂罍顏曰便民  
令允稱仙培自今夏甫卸輕舫巡視城堞經臨萬家  
情傾週相池真堪嘉惜碧流其別注乃玉甃竟碕斜  
前芳躅其曷舉後靈泉甯有涯載卜吉日搜石層窪  
濬流則朝宗無壅夾砌則映澄有花由是淵淳獻祥  
泉□効順潔淘可食冽井用汲於王明閭閻同霑喧  
市並登於河潤傾玉瓚於月島爭豔流杯撫湘琴於  
水簾配聲浮印蔚煌煌其昆明之派羌耿耿其瀚海

之源萬斛千層倒吸銀漢十里九折手披台垣清剛  
則紐乎地軸波溥則昭乎天門共深涵濡誰謝殷煩  
甯瞻望而徘徊抑努力而繾綣玻溜溜其自邇碧漭  
漭其及遠旣紆迴而暢達復綿亘而委婉餘愛日永  
棠甘奚諼沐膏澤者如一咏思樂者其萬遡文翁於  
前規知嘉惠乎舊館景隆儀於巖邊步芳跡乎澤畔  
冷香泉以和露杓倬章而赧翰泊乎和暢春風諧調  
秋雨倚樓玩波羣欣樂土提甕汲漿咸歌冒怙飲瓊  
液而果腹者連肆挹玉露而咏勤者比戶鼓舞兮蘭  
游泳允矣漣漪